

M343: Ulrich von Türheim: Rennewart (B)

0,1 HErre Geist Vat' vnd kint .
0,2 Div driv gar an dir eine sint .
0,3 Du bist gedriet doch in ein .
0,4 Vnd hiezze den st'n daz er shei-
0,5 Vnd die dri kuenge wiste
0,6 D' ieglicher dich priste
0,7 D' stern liez sie niht irren
0,8 Ein kuenc d' braht dir mirren
0,9 Die zwen wirauch vnd golt
0,10 Sie warn dinr geburte holt
0,11 Die rehten warheit du weist
0,12 Ez was ein reiner volleist
0,13 Dise driv . die dri . brahten drin
0,14 Sus kan din ein gedriet sin
0,15 Vnd da bi manictusentvalt
0,16 Diz tuot din gotlich gewalt
0,17 Swaz du wilt daz muoz geshehen
0,18 Herre ich han vil gesehen
0,19 Dinr wunderlichen tat
0,20 Vil hochgelobtiv trinitat
0,21 Du en hiezze da-noch nit wan got
0,22 Do der engel din gebot
0,23 Der reinen maget kunte
0,24 Vnd din geist ir lip enzunte
0,25 Daz sie von worte swang' wart
0,26 Wol vns der saeligen vart
0,27 Daz du ie geborn wuerde
0,28 So reine wart nie buerde
0,29 Als dich truoc div sueze maget
0,30 Von dinr geburt ist vns ertaget
0,31 Vil vracude vnd groze wunne
0,32 Wir wurden erst din kunne
0,33 Da du die mensheit enpfienge
0,34 Vnd die gnade begienge
0,35 Daz din helflicher trost
0,36 Vil manige sele hat erlost
0,37 Vnd adamen den armen
0,38 Der begunde dich erbarmen

0,39 Daz er was da zu helle
0,40 Vil manige gnade ich zelle
0,41 Die du an vns begangen hast
0,42 Vnd aber nymmer me begast
0,43 Du en wirst nymmer me geborn
0,44 Noch magt zu muoter dir erkorn
0,45 Du gewin-nest auch nymm' me iuge-t
0,46 Du muost in der alten tugent
0,47 Bliben der du da pflaege
0,48 E . du in der krippen gelaege
0,49 Da ein esel vnd ein rint
0,50 Dich burgen reines suezes kint
0,51 Vor dem kuenge herodes
0,52 Der gerte dines todes
0,53 Sin zorn was gein dir swinde
0,54 Man ertote vil der kinde
0,55 Daz man dich alles suohte
0,56 Din geist da des geruohte
0,57 Daz er dem engel kunte
0,58 Daz er Ioseben runte
0,59 Daz er dich in egypten truoc
0,60 Waz daz nit wunderlich gnuoc
0,61 Daz man dich nach der alten . e .
0,62 Besneit . des Gestates du Ny-m' me
0,63 Noch daz Iohannes taufe
0,64 Vnd Iudas aber verkaufe
0,65 Der dich gein den Iuden verriet
0,66 Div selbe vngetriwe diet
0,67 Dich des todes noten
0,68 Da mit si sich selben toten
0,69 Verlorn muezen sie ymmer wesen
0,70 Da kunde div gotheit genesen
0,71 Da man die mensheit begruop
0,72 Wol vns was sich vraeuden huop
0,73 Da du anderweit erstuende
0,74 Was waz din gewalt do tuende
0,75 Din zeswe hant die helle entsloz
0,76 Vil manic sele des genoz
0,77 Von diner guete daz geshach
0,78 Als gern dich adam do sach
0,79 Als gern muzes du mich sehen
0,80 So daz gerihte sol geshehen
0,81 E . mueze ich werden svenden vri
0,82 La mich geniezen . daz ich si
0,83 Ein din arme hantgetat
0,84 Herre gib mir dinen rat
0,85 Als ich an dich muote
0,86 Mine bete enpfah zu guote

0,87 Suezer got ich wil dich biten
0,88 Vnd manen swaz du hast erliten
0,89 Durch mich . vnd al die kristenheit
0,90 Daz du dir lazes wesen leit
0,91 Daz ich dir bin enthuldet
0,92 Daz han ich wol vershuldet
0,93 MIt maniger missewende
0,94 Dinen geist mir h're sende
0,95 D' mich des weges wise
0,96 Der da get zu m paradyse
0,97 D' ist leider mir noch zu enge
0,98 Got h're mir des nit verhenge
0,99 Daz mir der lip ersterbe
0,100 E . ich din hulde erwerbe
0,101 Vnd gar von svenden sheide
0,102 Ie fuer eine tageweide
0,103 Ich gein dem tode rite
0,104 Nu heiz den tot daz er bite
0,105 Vntz ich mich baz berihte
0,106 Herre gein dem gerihte
0,107 Daz vber al die welt gat
0,108 Als ie der me-she v'shuldet hat
0,109 Dar nach enpfieng er des lon
0,110 Nu solt du dich Tetragramaton
0,111 Mir durch dine guete geben
0,112 Da daz ymmer wernde leben
0,113 Des gernt mine sinne
0,114 Des beginnes ich hie beginne
0,115 Daz ich den hie so gespreche
0,116 Daz ez die svende breche
0,117 Sprach ich ie daz gelogen was
0,118 Daz man doch leider gerne las
0,119 Wan ez gezoch sich gein der welte
0,120 Herre mit disem gelte
0,121 Wil ich die luege buezen
0,122 Vnd wil z mit worten suezen
0,123 Daz nie tuetshe bezzer wart
0,124 Sit daz dir nihsnit ist v'spart
0,125 So erkenne herre Adonay
0,126 Daz ditz getihte din dienst si
0,127 Herre des Gewer Mich
0,128 Hie mit wil ich eren dich
0,129 Vnd den werden Markis
0,130 Der eruhten hat daz paradys
0,131 In manigem strite herte
0,132 Den vngelauben er werte
0,133 Ich mein sancte willehalmen
0,134 Also war so einen salmen

0,135 Suelte ir dise rede han
0,136 Ez ist ein warheit svnder wan
0,137 Daz ich ane missewende
0,138 Diz buoch wil bringen zu ende
0,139 Daz ich mih s nymmer wil gesham-
0,140 Sus heb ich an in gotes namen
0,141 Vnd durch ein guotes wip
0,142 Div mit eren hat ir lip
0,143 Gebeitet shone vnd wol
0,144 Gote vnd ir ich dienen sol
0,145 Daz iz ane shame belibe
0,146 Dem selben guoten wibe
0,147 Fur alle wip ich guotes gan
0,148 Ich missetaete gar dar an
0,149 Ob ich nit gerne taete
0,150 Swes div guote mich gebaete
0,151 Mit bete sie also an mich kam
0,152 Daz minen triwen nit gezam
0,153 Ob i z verzigen ir haete
0,154 Min triwe ist gein ir staete
0,155 Vnd muoz daz ymmer wesen
0,156 Swer sines getihtes hat gelesen
0,157 Daz der wise wolfram do sprach
0,158 Man nante in von Eshenbach
0,159 Ez waz sueze vnd meisterlich
0,160 Ich von Tuerheim Vlrich
0,161 Mit vorhten mich dar binde
0,162 Daz ich mich vnderwinde
0,163 Daz er gestocket hat sin zil
0,164 Dar v-me ich doch nit lazen wil
0,165 E . sie werde volletihtet
0,166 Er hat vns dar berihtet
0,167 Daz ist gnugen wol bekant
0,168 Sus rumte er prouenzalen lant
0,169 Da geshach div shumpfentuere
0,170 Manic ritter vil gehuere
0,171 Was doch da tot gelegen
0,172 Der helle vluoch des hymels seggen
0,173 Wart erworben von in beiden
0,174 V-me ir shaden vnd v-me sheiden
0,175 Hat ir wol vernomen . e .
0,176 Dem Markise tet vil we
0,177 Do er Rennewartes v'miste
0,178 Vnd nit die warheit wiste
0,179 Ob er was lebendic oder tot
0,180 D' zwiuel angest im gebot
0,181 Vnd daz im vraeude gar verswa-t
0,182 Wan ez erviht des heldes hant

0,183 Der kristenheite gar den sige
0,184 Vil vngerne ich nu verswige
0,185 Ich en sagte rehte wie Terramer
0,186 Tet den vluehteclichen ker
0,187 Er vnd sin vil michel her
0,188 Begunden gahen gein dem mer
0,189 Vnd gein vil manigen shiffen
0,190 Da sie div shif ergriffen
0,191 Vor vorhten sie nit liezen
0,192 Div Shif sie an Stiezen
0,193 Die minren vnd die m'ren
0,194 Sie enbeiten nit irs herren
0,195 Des hochgelobten w'den
0,196 Der bleip da vf der erden
0,197 Balde gahten hin div shif
0,198 Der hat manic purrif
0,199 In dem strite geslagen
0,200 Der begunde nach in iagen
0,201 Vnd von kristen nieman mer
0,202 Rennewart ruofte Terramer
0,203 Er sprach "edel ritte guot
0,204 Shende nit dins ellens muot
0,205 Dinr krone zimt nit div vluht
0,206 Din pris bestat der sha-den suht
0,207 Daz er ymmer mer ist siech
0,208 Vnd gein hohem lobe shiech
0,209 Dine krone nit en shende
0,210 Getruwe der hoehsten hende
0,211 D' geshuf den anevanc vn- daz drum
0,212 Vnd ruoche erkennen Ihesum
0,213 Des gewalt vns git vnd nimt
0,214 Swes in zu tuonn gezimt
0,215 Da en mag gesin nit wider
0,216 Swaz bein hat oder gevider
0,217 Oder wehset oder vluezet
0,218 swenne Ihesum des verdruezet
0,219 So muoz ez verdorben sin
0,220 Herre lieber vater min
0,221 Din kint daz ruoche hoeren
0,222 Laz appollen dich nit toeren
0,223 Vnd ander dine valshen gote
0,224 Vater volge dem gebote
0,225 Swaz Ihesus dir gebiete
0,226 Ob ich dich vater verriete
0,227 So en hete ich nit rehten sin
0,228 Ich weiz wol daz ich von dir bin
0,229 Herre Terramer geborn
0,230 Weist u wenn ich wart verlorn

0,231 Ich was in kurtzen kindes tagen
0,232 Herre la dir die warheit sagen
0,233 Vnd rehte wisen vf die vart
0,234 Ich bin din svn Rennewart
0,235 Der geriten hat den bogen
0,236 Vater herre ich bin erzogen
0,237 Ich en weiz wa oder wie
0,238 Swar ich kam ie ich bin nu hie
0,239 Mit gesundem starkem libe .
0,240 Wistes du wie Ihesus shibe
0,241 Gat . du en geruohtes mahmeten
0,242 Nymmer me ane gebeten
0,243 Noch deheinen sinen genoz
0,244 Kristes kraft div ist so groz
0,245 Daz ir nieman ane gesiget
0,246 Swer sich krieges bewiget
0,247 Daz gelaube herre Terramer
0,248 Din nam von wirde ist vil her
0,249 Von wem has tu gewalt
0,250 Dinr iartage hat er gezalt
0,251 Wan er hiez dich werden
0,252 Der den hymel vnd die erden
0,253 Geshuof . vnd die svnnen
0,254 Dine gote des nit kunnen
0,255 Noch muegen ez nit gelernen
0,256 Wie vil hant zal die sternen
0,257 Die Ist dinen Goten Vnbekant
0,258 Hamon vnd Teruigant
0,259 Muegen anders nit geleben
0,260 Wan als in Ihesus ruochet geben
0,261 Du solt an in gelauben
0,262 Der kunde die helle rauben
0,263 Vnd erloesen da Adamen
0,264 Den er ane menshen samen
0,265 Kunde nach im machen
0,266 An schone nit v'schwachen
0,267 Iesus der ist vns sippe
0,268 Er nam Adame ein rippe
0,269 Vnd worhte dar vz Euam
0,270 Daz vns zu aerbeite kam
0,271 Da er die zwei geworhte
0,272 Da gebot er in mit vorhte
0,273 Daz sie behielten daz gebot
0,274 Da wurden sie ir selbes spot
0,275 Eua daz gebot zubruch
0,276 An eim obze daz geschach
0,277 Vil der kristen nit en weiz
0,278 An waz obzes eua beiz

0,279 Vater des wil ich dich vragen
0,280 Wolt ez dich nit betragen
0,281 Ob ez si dinen goten kunt”
0,282 “Rennewart tuo zuo dinen munt
0,283 Vnd la wesen din claffen
0,284 Ich zel dich gar zu eim Affen
0,285 Vnd en waerst u nit min kint
0,286 Alle die hie bi mir sint
0,287 Die en kuenden nymmer dich ernern
0,288 Ich en woelt des libes dich behern
0,289 Swaz shaden ich han genomen
0,290 Der ist aller von dir komen
0,291 Din hertze von triwen ist erieten
0,292 Minen gote herren Mahmeten
0,293 Has tu an lobe geswachet
0,294 Vnd Iesum hoch gemachet
0,295 Mahmet der ist doch din got
0,296 Vn- wuerde svn nach mime ge
0,297 Rennewart getaufet
0,298 Has tu daz leben verkaufet
0,299 Vnd dines kuennes dich gar bewege-
0,300 Swaz heiden hie ist tot gelegen
0,301 Der totes du daz merre teil
0,302 Du hast u’worht vil gar din heil
0,303 D’ gote gnade ist gein dir twerch
0,304 Du en wuerde nie min verch
0,305 Noch geboren von minem libe
0,306 Vil vbel geshehe dem wibe
0,307 Von der geboren du wuerde
0,308 Ez was des tivuels buerde
0,309 Swelch wip dich ie getruoc”
0,310 “Vater hoere ez ist genuoc
0,311 La vluochen vnd shelten
0,312 Oder ez muoz engelten
0,313 Der ez ist ane schulde
0,314 Noch hilf ich dir des hulde
0,315 Wilt u der ist der maegde kint
0,316 Wie geguetet sine guete sint
0,317 Ob daz dine sinne erkanden
0,318 Mahmeten vnd Teruiganden
0,319 Liezest u die helle buwen
0,320 Du solt mir vater getruwen
0,321 Als dinem lieben kinde
0,322 Durch Vorht Ich Niht Erwinde
0,323 Ich en welle dir auch von de- ki-de sagen
0,324 Daz ein maget hat getragen
0,325 Vnd von der maget div ez gebar
0,326 Div ist so wol gereinet gar

0,327 Ane den d' zu ir libe was bespart
0,328 Da nie nit so reines wart
0,329 Der was ir vater vnd ir kint"
0,330 "Herre Rennewart enbint
0,331 Mit disem starken maere
0,332 Wie disem kinde waere
0,333 Daz kunde svn vnd vater wesen
0,334 Wir han d' buoche nit gelesen
0,335 Daz ieman geshriben vinde
0,336 Daz vater mit dem kinde
0,337 Vz einem munde geben geist"
0,338 "Vater ich waen du en weist
0,339 Die gewizzen ist dir wilde
0,340 Ez shinet in einem bilde
0,341 D' kristengot vnd sint sin dri
0,342 Hoer wer ieglicher si
0,343 Des wil ich dich bescheiden
0,344 Kristen Iuden heiden
0,345 Pfliget der trinitate gewalt
0,346 Vater du bist an iaren alt
0,347 Von vil tagen din bart ist wiz
0,348 Nu la diner witze vliz
0,349 An dinem ende shawen
0,350 Vnd minne die suezen vrawen
0,351 Div maget wesende den gebar
0,352 D' aelliv dinc erkennenet gar
0,353 Vater daz ist ein hohes wort
0,354 Ez ist der kristenliche hort
0,355 Vnser vater got der alte
0,356 Der pfliget mit gewalte
0,357 Der kristenheite manigiv iar
0,358 Swaz ich sage daz ist war
0,359 Er selbe ist vater vnd kint
0,360 Div zwei in einem bilde sint
0,361 Vnd der here reine geist
0,362 O we vater daz du nit weist
0,363 Daz der kristenheite got
0,364 Gar geshuof mit sime gebot
0,365 Daz er zu einem menshen wart
0,366 D' heidenschaft ist gar verspart
0,367 swaz sich gein der warheit zoget
0,368 Ihesus der ist aller der welte voget
0,369 Swaz er wil daz muoz geshehen
0,370 Vater du hast wol gesehen
0,371 Ob du ez wilt erkennen
0,372 So muost u vater dich nennen
0,373 Daz nieman wart geboren
0,374 Der soelhen shaden habe erkorn

0,375 An manigem hochgelobten man
0,376 Wizze daz ich dir vergan
0,377 Daz du dich nit versinnest
0,378 Daz du vater entrinnest
0,379 Der dich hat gemacht
0,380 Sin guetiv sueze lachet
0,381 Swanne ku-met der verlorne
0,382 Ob du beites biz morne
0,383 So muost u lihte tot geligen
0,384 Laz an dir vater nit gesigen
0,385 Den tivuel d' ist der helle wirt
0,386 Gelaube mir du bist verirt
0,387 Vnd Vbergest u Minen Rat
0,388 Din lip vil hohe wurde hat
0,389 Von wem wilt u der iehen
0,390 Sprechen hoeren vnd sehen
0,391 Der here geist die gabe git
0,392 Swaz an dir werdekeite lit
0,393 In manigen witen landen
0,394 Has tu mit dinen handen
0,395 Beiaget in herter ritterschaft
0,396 Du hast von richeit groze kraft
0,397 D' ie was vnd ymmer wil leben
0,398 Sich der hat sie dir gegeben
0,399 Vnd manige hohe krone
0,400 Dehein kuenc lebet so shone
0,401 Oder fuer dich habe gewalt
0,402 Du hast dem kuenge Tybalt
0,403 V'derbet manigen w'den man
0,404 Mit niht ich erdenken kan
0,405 War v-me du vater daz tuost
0,406 Vil hohe du noch gelten muost
0,407 Swaz hie lit der kristen tot"
0,408 "Rennewart swaz der grozen not
0,409 Hat erliten div heidenschaft
0,410 Daz tet gar din eines kraft
0,411 Du sluege den neuen den bruoder
0,412 Vz stahel geworht ein ruoder
0,413 Daz du in der hant da truege
0,414 Da mit du sie alle sluege
0,415 Mit der grozen stangen lanc
0,416 Geshach manic vngefueger swanc
0,417 DIe wile daz div werte
0,418 Dar nach mit eime swerte
0,419 Begundes du so sere slahen
0,420 Daz man mit des bluotes ahen
0,421 Die erden da sach begiezzen
0,422 Mich mohte wol verdriezen

0,423 Maniger vreaude der ich pflac
0,424 Ich en gelebe nymm' gerne tac
0,425 E· daz mir vf Alytshantz
0,426 Wider gevellet des prises glantz
0,427 Sun den has tu mir verlorn
0,428 Div schulde si gein dir verkorn
0,429 Vn- mi-necliche gar vergeben
0,430 Wilt u minen goten leben
0,431 Von den han ich manic lant
0,432 Ich wil lihen diner hant
0,433 Zehen krone richeit
0,434 Din haubt zu rehte krone treit
0,435 Als ander din geslaehte
0,436 Din lip vil gerne maehte
0,437 Maniger lande han gewalt
0,438 Danne ein versmahter ribalt
0,439 Noch eren svmte nit din lip
0,440 Erkantes du daz reine wip
0,441 Wol dienstes kuenden lonen
0,442 Du beguendes da von shonen
0,443 Vnd verderbtes keinn ir dienstma-
0,444 Din adel nit der fuoge kan
0,445 Du en ruoches wer da tot gelit
0,446 Oder lebende lat den strit
0,447 REnewart daz erke-ne
0,448 Mine gote- dich zu dienste ne-ne
0,449 Sun ob du des nit tuost
0,450 So wizze daz du ymmer muost
0,451 Tragen mines hertzen dro"
0,452 "Daz Ist Mir Als Ein Altes Stro
0,453 Ob ich wol von Hamone
0,454 Moechte haben alle krone
0,455 Vnd gewaltic sin aller lande
0,456 Von dem valshen Teruigande
0,457 Vngerne ich ihtes naeme
0,458 Daz Ihesu missezaeme
0,459 Ich han mich gelazen gar an in
0,460 Min lip min hertze vnd der sin
0,461 Volgen woellent sime gebote
0,462 Vater wa beleip min tote
0,463 Der trugehafte Mahmet
0,464 Da Ihesus vns genade tet
0,465 Daz die kristenlichen diet
0,466 Sin helfe da des siges beriet
0,467 Dinen svn solt du nit triegen
0,468 Kuennen dine gote vliegen
0,469 Daz ist nu zu staten komen
0,470 Vater has tu iht vernomen

0,471 Ob sie hin zu hymel komen
0,472 Du glichest eime dumen
0,473 Mit torlichem gebraechte
0,474 Ob ich wol mit eren maehte
0,475 Nymmer ich dir z vertruege
0,476 Swer dich ane mich sluege
0,477 DEm waer ich ymmer holt
0,478 Daz ist daz gearnen du solt
0,479 Du verworhter heidens diep
0,480 Ich weiz wol ez ist Ihesu lieb
0,481 Ob ich dich gar verderbe
0,482 Vnd nit dinen glauben erbe
0,483 Des wil ich mich verzihen
0,484 Krist herre nu ruoche mir lihen
0,485 Swaz min vater gewaltes pfliget
0,486 Du hast auch herre got gesiget
0,487 Mit diner reinen krefte
0,488 An aller der heidenshefte
0,489 Mit diner helfe wil ich gesigen
0,490 Terramer muoz tot geligen
0,491 Mich en wende da-n div goteshant
0,492 Herre Ihesus wis gemant
0,493 Wis dinen trost mir gebende
0,494 Daz er beste iht lebende
0,495 Er hat ez verworht vil dicke
0,496 Ir sit in einem stricke
0,497 Der sich niht gahes loesen kan
0,498 Ir sundenhafter man
0,499 War v-me en denkt ir nit w' ivch geshuf
0,500 Iv ist gesaget wol der ruof
0,501 Den er an dem cruece tet
0,502 Vater volget miner bet
0,503 Lat den vngelauben wesen
0,504 So wil ich ivch lan genesen"
0,505 "O we" sprach er Rennewart
0,506 Wie wilt u Ihesu sin so zart
0,507 Has tu sinen rat gesworn
0,508 So solt u blasen lihte ein horn
0,509 So div vrstende wirt
0,510 Nu gelaube mir du wirdest v'irt
0,511 Din ruchet nit der kristene got
0,512 Vnd daz du vluehest daz gebot
0,513 Daz dir ist geslaht von arte
0,514 Da begunde Rennewarte
0,515 Daz hirn vaste wueten
0,516 Er sprach "ir suelt ivch hueten
0,517 Sit Min Vater Oder Niht
0,518 Ir muezet von mir des todes pfliht

0,519 Enpfahen die ist vnwendic”
0,520 Rennewart was genendic
0,521 Daz swert er drate zucte
0,522 An Terramern er ructe
0,523 Er begunde slahen vmme
0,524 Daz der wise vnd der tvmmme
0,525 Sich huoten vor den grozen slegen
0,526 Die begunde er dar so snelle legen
0,527 Als ob ez waer ein donrshoz
0,528 Er sluoc dem vater ein valkenboz
0,529 Daz sich daz haersnier zuclaup
0,530 Vnd dr uz vil der ringe staup
0,531 Ich waen daz ez braeste enzwei
0,532 Terramer vil lute shrei
0,533 “Wol hin balde wir sin verlorn
0,534 Rennewarte ist worden zorn
0,535 Nieman beite der wil genesen
0,536 Swer haltet der wil tot wesen”
0,537 Div vluht im nit versmahte
0,538 Einen kuenc er do e’gahte
0,539 Ab daz haubt er dem sluoc
0,540 Dem wart des zornes genuoc
0,541 Der was aloes genant
0,542 Jesa Rennewartes hant
0,543 Vil sere ein kuenc versneit
0,544 Den selben sterben doch vermeit
0,545 Der was genant Tampaste
0,546 Er het in strite da vor . e .
0,547 Dicke hohen pris erstriten
0,548 Durch wip groze not erliten
0,549 Sin lop daz gienc vil hohe enbor
0,550 Ein werder kuenc hiez kator
0,551 Dem sluog er eine wunden tief
0,552 Der selbe kuenc vil lute rief
0,553 “Rennewart nim hin min swert
0,554 Min pris etwenne was vil wert
0,555 Den has tu mir enzucket
0,556 Al heidensh leben v’drocket
0,557 An hochgelobten eren”
0,558 Da begunde Rennewart keren
0,559 Von im vnd liez im den lip
0,560 Ob er daz tet durch guotiv wip
0,561 Daz tuot mir nit daz maere kunt
0,562 Ein and’ kuenc wart da wunt
0,563 D’ was ein werder sarrazin
0,564 Vnd was genant Malgwin
0,565 Nieman was gein im zu wer
0,566 Da sie kamen zu dem mer

0,567 Samt nit gesundert
0,568 Der kuenge warn hundert
0,569 Die mit Terramere
0,570 Taten des vluhtes kere
0,571 Vnd gahten gein den shiffen
0,572 Da sie die ergriffen
0,573 Sie selbe zugen die riemen
0,574 Da en was da anders niemen
0,575 Der sie dannen fuorte
0,576 Jeslicher vaste ruorte
0,577 Den lip biz si dar kamen
0,578 Da sie gemach in namen
0,579 Alsus gefuor da Terramer
0,580 Ob er nit leitliches ser
0,581 Dolte . so was er herte
0,582 Im Bleip Manic Liep Geuerte
0,583 Der werlich was getoetet
0,584 Alytshanz wart geroetet
0,585 Mit maniges heldes bluote
0,586 Sach man wip leit gemuote
0,587 D' ir vriunt da was erslagen
0,588 Div en kunde an triwen nit v'zagen
0,589 Swer weiz wie liep ist wibes lon
0,590 Vnd daz ez hat so suezen don
0,591 Swer ez zu rehte bringet
0,592 Der vraeluden liet er singet
0,593 Terramer fuor gein kordes
0,594 Er hete vil des mordes
0,595 Geschaffet vnd sin gewalt
0,596 Vnd was bestuont in Tybalt
0,597 Do arabel von im kam
0,598 Vnd durch den Markis genam
0,599 Den glauben vnd sich taufte
0,600 Vnd mit taufe kaufte
0,601 Daz div sele ruowe pfliget
0,602 So der lip tot geliget
0,603 Swie vil der heiden verdarp
0,604 Da mit Arable niht erwarf
0,605 Deheiner suenden schulde
0,606 Sie liez durch gotes hulde
0,607 Maniger eren wunne
0,608 Lant . kint . vnd kunne
0,609 Des kunde si alles sich bewegen
0,610 Durch in der git der saelden segen
0,611 Da Terramer zu kordes kam
0,612 Vnd div heidenschaft v'nam
0,613 Daz er den shaden het erkorn
0,614 "O we daz ie wart geborn

0,615 Tybalt der diz wirbet
0,616 Von sime gewerbe verdirbet
0,617 Div heidenschaft an prise”
0,618 Sprach der tumme vnd der wise
0,619 Den die mage lagen tot
0,620 Nu was beliben in grozer not
0,621 Der heiden eim michel her
0,622 Die nit mohten vf daz mer
0,623 Komen mit Terramere
0,624 Mit grozem hertzen sere
0,625 Lebten die ellenden
0,626 Wa hin sie solten wenden
0,627 Daz was in vil vnbeant
0,628 Ir was ane die zal benant
0,629 Zehen tusent oder me
0,630 Da sie bi des meres se
0,631 Mit grozer vorhte lagen
0,632 Vn- ir dinc zu dem besten wagen
0,633 Da kam gevarn veber mer
0,634 Ein maectic kuenc ane her
0,635 Der was lang vnd vil groz
0,636 An sterke nieman sin genoz
0,637 Der da lebte bi den tagen
0,638 Im muoste ein vil starker wagen
0,639 Tragen die vil swaern stange
0,640 Nie Rise gewan so lange
0,641 Noch so mychel ysencleit
0,642 Der Rise mit im da nieman heit
0,643 Wan die sins dinges pflagen
0,644 Die an dem mer da lagen
0,645 Als in die ersahen
0,646 Sie begunden gein im gahen
0,647 Sie riten Oder Liefen
0,648 An den kuenc sie riefen
0,649 “Vil hochgeborner sarrazin
0,650 La dich erbarmen vnser pin
0,651 Die wir doln vnd han erliten
0,652 Daz kristenher daz hat erstrite-
0,653 Den sig an der heidenschaft
0,654 Terramer der hate die kraft
0,655 Von lueten daz ein wunder ist
0,656 Daz ie mohte gesigen krist
0,657 Daz her ist me da-ne halbes tot
0,658 Herre ez ist ein groze not
0,659 Wir en wizzen wa-ne vnser leben
0,660 Wirt dem tode gegeben
0,661 Daz ist ein aengstlichiv warte
0,662 Huete dich vor Rennewarte

0,663 Der sleht Ros vnd man
0,664 Nieman vor im genesen kan
0,665 Er ist stark vnd kuene
0,666 Mueges du herre so svne
0,667 Den Markis vnd Terramern
0,668 Ez lebt vnder beiden heren
0,669 Ich waene nit der dritte man
0,670 Nieman vns gehelfen kan
0,671 Wir sin des todes eigen
0,672 Nu ruoche dine gnade zeigen
0,673 An vns armen sarrazinen
0,674 Mit kummerlichen pinen
0,675 Sin wir herre veberladen
0,676 La erbarmen dich den shaden
0,677 Den Terramer hat genomen
0,678 Er ist selbe kume hin komen
0,679 Von dem risen starken
0,680 Kyele kocken barken
0,681 Galyne ysier senyez
0,682 Al der keines man vns liez
0,683 Svs sin wir hie bestanden
0,684 Vnser leben ist enblanden
0,685 Suel wir ez lange liden
0,686 Wil vns din trost nu miden
0,687 So ist nieman der vns nere
0,688 Oder Rennewarte wer
0,689 Er nem vil balde vns den lip
0,690 Sin ellen hat vil manic wip
0,691 Gesetzt in sende swaere
0,692 Wir en glauben nit der maere
0,693 Daz er ie menshe wuerde
0,694 Als er die heiden muerde
0,695 Ermordet werde er alsam”
0,696 Der rise sprach “wie ist sin nam
0,697 Saget mir ist er ein kristen
0,698 In kan nieman gevrissen
0,699 Ersihe ich in er ist tot
0,700 Vuerhtet nit mer deheine not
0,701 Ir en duerft nit mer sorgen
0,702 Weder den abent oder den morgen
0,703 Ich waer in diz lant nit komen
0,704 Wan daz ich hete dort vernomen
0,705 Da heim in minem lande
0,706 Von dem selben wigande
0,707 Der also sere vihtet
0,708 Vnd die heiden hat berihtet
0,709 Vil shaden vnd shanden
0,710 Swa er wonte in den landen

0,711 Da muz ich in vinden
0,712 Ich wil Iuch Alle Enbinden
0,713 Von sorgen vnd von leiden
0,714 Wir sin vil vngescheiden
0,715 Komen wir an einander
0,716 Der ein vnd der ander
0,717 Wunsten daz daz geschaehe
0,718 Swenne er in ersaehe
0,719 Daz Maehmeten danne gezaeme
0,720 Daz er sin ende naeme”
0,721 Der rise hin zu den heiden sprach
0,722 “Ir herren vart an iwer gemach
0,723 Lebt swie iv gevalle
0,724 Vnd vuerhtet iv nit betalle”
0,725 Alsus schiet er von in dan
0,726 Vnd suohte den ellenthaften man
0,727 Da begunden auch die heiden
0,728 Von dem leger sheiden
0,729 Da bi doch vil nahen
0,730 Ein erbuwen velt sie sahen
0,731 Da stunden bonen vnd ander krut
0,732 Der bu den lueten was vil trut
0,733 Die in heten gebuwen
0,734 Sie en mohten des nit truwen
0,735 Daz ymmer heidenishe shar
0,736 In zu shaden kaeme dar
0,737 Den bu sie in erwusten
0,738 Den shaden liden muosten
0,739 Die man mit ir wiben
0,740 Vluhen da sie bliben
0,741 Wolten vnd mit ir kinden
0,742 Sie getorsten nit erwinden
0,743 MIt grozer not sie rungen
0,744 Die alten vnd die ivngen
0,745 Da erkante got ir vngemach
0,746 Ir einer vnder in ersach
0,747 Den maenlichen Rennewart
0,748 Da was langer nit gespart
0,749 Er begunde gahen hin zu im
0,750 Vnd sprach “herre nu vernim
0,751 Durch dinen hochgelobten pris
0,752 Ich pin ein armer shetis
0,753 Herre mich hant die heiden
0,754 Von guote gar gescheiden
0,755 Minen bu gar verwuestet
0,756 Wolte gar daz ir muestet
0,757 Sehen . wie sie mich aehtent
0,758 Etlichen ir dar zu braehtent

0,759 Daz er daz mine lieze ligen
0,760 Alle min habe was gedigen
0,761 Nivr wan an die selben sat
0,762 Der mich nu enterbet hat
0,763 Der tivuel vnd die sine”
0,764 “Sprich sint ez sarrazine
0,765 Ganc hin kunne baz ir leben
0,766 Ich wil dir dri stunt mer geben
0,767 Danne dort genomen ist”
0,768 Der gebur was in kurtzer vrist
0,769 Komen da sie lagen
0,770 Vnd ir gemaches pflagen
0,771 “Montshoye” rief er vaste
0,772 Die heiden von ir raste
0,773 Begunden balde gahen balde
0,774 Dem kuenge Tybalde
0,775 Wart da vil gevluochet
0,776 Der gebur der en ruochet
0,777 War Kamen Die Sarrazine
0,778 Da im bleip daz sine
0,779 Nu begunde Rennewart
0,780 Nach der heiden vart
0,781 Vaste vmmeßweifen
0,782 Vnd nach ir shaden greifen
0,783 Als ein hunt tuot nach dem tiere
0,784 Er kam zu der verte shiere
0,785 Als ein gerechter bracke
0,786 Waer im bekomen ein dracke
0,787 Den en het er nit vermiten
0,788 Er mueste mit im han gestriten
0,789 Rennewart begunde suoehen
0,790 In walden vnd in bruochen
0,791 An wisen vnd an awen
0,792 Hie suelt ir wunder shawen
0,793 Daz er selbe kunde sin
0,794 Ein hoch geborner sarrazin
0,795 Vnd er in daz hazzen truoc
0,796 Ich waen ez was ein vnfuoc
0,797 Daz er ir so vil ertote
0,798 Vnd nit des glauben note
0,799 An den selben stunden
0,800 Er hete den da funden
0,801 D’ gern ein kristen wolte wesen
0,802 Daz er n hete lan genesen
0,803 Dar v-me er nit en ruohte
0,804 Er fuor fuerbaz vnd suohte
0,805 Ob er iema-ne fvende
0,806 Dem er des todes guende

0,807 Nu vant er sarrazine
0,808 Die muosten doln pine
0,809 Fuenfzehen hundert ir waren
0,810 Die sterben da nit verbaren
0,811 Mit ein ander er sie bestunt
0,812 Die taten als die noch tunt
0,813 Die nit woellen sterben ane wer
0,814 Bi miner triwe ich des swer
0,815 Vil dicke ih z vernomen habe
0,816 Ez ist bezzer kampf da-n hals abe
0,817 Genuoge sich da werten
0,818 Die doch daz leben verzerten
0,819 Genuoge begunden vlihen
0,820 Nach den begunde ziehen
0,821 Der vil kuene Rennewart
0,822 Die heiden warn vngespart
0,823 Swaz ir getorste vehten
0,824 Den struben vnd den slehten
0,825 Gab er manigen grozen slac
0,826 Vil kume man gelauben mag
0,827 Den mort den Rennewart begie
0,828 Der tote dort der wunde hie
0,829 Da warn helde vnd zagen
0,830 Die begunde Rennewart gar iagen
0,831 Als ob sie waern wilde
0,832 Diz was vf eim gevilde
0,833 Uor eime grozen walde
0,834 Nu was da bi ein halde
0,835 Niht zu verre hin dan
0,836 Da habte ein wol gemachet man
0,837 Niur' wan er selbe vierde
0,838 Vil riche was sin gezierde
0,839 swaz waz an sime libe
0,840 Ich waen er guotem wibe
0,841 Da wolte gern dienst bern
0,16254 Als Vil dicke was Getan
0,16255 da sie gemaches pflagen
0,16256 Vnd ez lantlueten vnd magen
0,16257 Buten wol vnd vil shone
0,16258 Gar nach des prises lone
0,16259 Sit gewonnen sie aber gnuog
0,16260 Der die vil swaeren stangen truog
0,16261 Durch wer in siner hende
0,16262 Er sprach "got mich noch sende
0,16263 Da man mich muege spisen
0,16264 Vnd daz ich dan alysen
0,16265 Von gotes gebote funde
0,16266 Lebende vnd wol gesunde

0,16267 Swenne ich zu Orense kaeme
0,16268 Fuer war ich daz naeme
0,16269 E . daz breit ertriche
0,16270 Daz wizze waerliche
0,16271 Ich wuerde wider zu leygen
0,16272 Gotes guete mir kuende neigen
0,16273 Min hoch gemuete des ich pflac
0,16274 da alyse mir tot gelac
0,16275 Vnd ich Malfern verlos
0,16276 da von vraeude mich verkos
0,16277 Mins herzen wunne mir verswant
0,16278 Ich satzte miner vraeuden pfant
0,16279 Vnd ist daz ymmer vnerlost
0,16280 Got nu gib mir doch den trost
0,16281 Daz sie besitze daz paradys”
0,16282 Sus antwurte im der Markys
0,16283 “Rennewart ich han wol gehort
0,16284 Dine claelichen wort
0,16285 Nach dinem wibe vil reine
0,16286 Der tot ist so gemeine
0,16287 Daz er nieman lat genesen
0,16288 Ich hoert an den buochen lesen
0,16289 Daz merke lieber Rennewart
0,16290 Daz hie luetzel ieman wart
0,16291 Nach dem tode lebende
0,16292 Got was im selbe gebende
0,16293 Daz leben nach sins todes vrist
0,16294 Wol vns daz ie erstuont krist
0,16295 Von siner hern vrstende
0,16296 Braht maniger sele gebende
0,16297 Da sin gewalt die helle entsloz
0,16298 Gotes guete die ist so groz
0,16299 daz nieman sie veber kan
0,16300 Rennewart ez was hie vor ein man
0,16301 Der selbe Ionas was genant
0,16302 Lebende in einem vishe versant
0,16303 dri tage er in im was
0,16304 Von gotes helfe er genas
0,16305 daz er lebendig von im kam
0,16306 des wunders gezam Messyam
0,16307 Waz daz wunder bezeichent
0,16308 Mine sinne da hin niht reichent
0,16309 Daz ich ez bescheiden kuenne”
0,16310 “Markys din fuege mir gunne
0,16311 Swes ich dich woelle vragen
0,16312 Des sol dich nit betragen
0,16313 Was mannes was messyas”
0,16314 “Rennewart des div maget genas”

0,16315 “Markys daz ist altissimus
0,16316 Vnd enpfeng durch vns den kus
0,16317 Den im scarioth bot
0,16318 Der kus der lost vns von der not
0,16319 Div vns Von Euen Geshach
0,16320 do sie daz gebot zerbrach”
0,16321 “Rennewart du hast war geseit
0,16322 Got noch manigen namen heit
0,16323 Er heizt auch adonay
0,16324 Hat er namen me danne dri
0,16325 Er hat zwene vnd sibenzec namen”
0,16326 “Markis des kan min tauf sich shamen
0,16327 Daz ich der niht erkenne me
0,16328 Vnd het ich sie erkennet . e .
0,16329 In waer vil shone von mir genigen”
0,16330 Der rede sie do bede swigen
0,16331 Der Markis vnd Rennewart
0,16332 Die rede reiten s vf der vart
0,16333 Mit triwen ane allen var
0,16334 Nu was der Markis ein iar
0,16335 Vnd dri manade vz gewesen
0,16336 Nu begunde dunken kyllamesen
0,16337 Wie er nahete dem lande
0,16338 da man in herre nande
0,16339 Des vraewet er sich vil harte
0,16340 Vnd sprach zu Rennewarte
0,16341 “Rennewart gehabe dich wol
0,16342 Vnser kummerlichiv dol
0,16343 Vil shiere sich wil enden
0,16344 Got wil vns gahens senden
0,16345 Da wir gemaches sueln pflegen
0,16346 Vnd alles kummers gar bewegen
0,16347 Wir sueln shier zu Orense komen
0,16348 Hant mir z die heiden niht benomen
0,16349 Des ich doch ane angest bin”
0,16350 “Herre Markis so wol hin
0,16351 Vnd haben deheine raste
0,16352 So sueln wir gahen vaste
0,16353 Vnd haben deheine twale
0,16354 Biz wir komen zu prouenzale
0,16355 So sueln wir ruowen biz an die zit
0,16356 Vntz vns div muede gar begit
0,16357 Wan ich gemaches nit en pflac
0,16358 Sit alyse mir tot gelac
0,16359 Vnd von Portebaliart shiet
0,16360 Grozer iamer vraeude mir verriet
0,16361 Daz sie wirt nymmer me so guot
0,16362 Ir wiplich lop was so behuot

0,16363 daz mich ir tot muoz ymmer muen
0,16364 Vnd herzelichen kummer bluen
0,16365 A we vil lieber willehalm
0,16366 Wie was so hel ir lobes galm
0,16367 Ich waen er hal fuer alliv wip
0,16368 Ez wart nie reiner wibes lip
0,16369 Vor allen wan dan alyse was
0,16370 Mich wundert noch daz ich genas
0,16371 da mins herzen wunne starp
0,16372 Ir tot mir doch die not erwarp
0,16373 Die mir hat vraeude ertoetet
0,16374 Vnd ymmer iamers noetet”
0,16375 “REnnewart dins herzen clage
0,16376 Ich mit dir gemeine trage
0,16377 Durch got nit mer en trure
0,16378 Der heidenschaft kumet ein shure
0,16379 An dir wan ich dich bringe
0,16380 Zu Orense ist min gedinge
0,16381 Daz kyburg enbunden wirt
0,16382 Vnd alles truren gar verbirt
0,16383 So dich ir auge an blicket
0,16384 Ir Vraeude Dich Bekicket
0,16385 So daz ir truren gar zergat
0,16386 Vnd ir herze vro bestat
0,16387 Von aller kummerlichen dol
0,16388 Rennewart gehabe dich wol
0,16389 Vns kan nu niht gewerren
0,16390 Groz kummer muoz vns verren
0,16391 Wir sin Orense vil nahen
0,16392 Da man dich so sol enpfahen
0,16393 Daz nieman baz enpfangen wart”
0,16394 “Des lob ich got” sprach Rennewart
0,16395 Nu was vil nahe da bi
0,16396 Kume veber kurzer milen dri
0,16397 Ein heidenish woldan von dem her
0,16398 Geriten mit vil guoter wer
0,16399 Wol vierzec Ritter oder baz
0,16400 Ich waene niht wan vmme daz
0,16401 Niewan durch guotes gewin
0,16402 Nu was ein Ritter vnder in
0,16403 Die zwene Ritter er gesach
0,16404 Zu den andern er do sprach
0,16405 “Shawet ich han dort ersehen
0,16406 Da von vns leit wol mag geshehen
0,16407 Hant sie vnser genomen war”
0,16408 Nu begunden sie alle sehen dar
0,16409 Vnd sprachen “wir sueln riten
0,16410 Vnd hie nit langer biten

0,16411 Ez ist der tivuel vnd sint kint
0,16412 Vnd sin wir niht an witzzen blint
0,16413 So sueln wir niht bi in wesen
0,16414 Wol hin balde wer woelle genesen”
0,16415 Sie begunden vaste vliehen
0,16416 Rennewart hin nach in ziehen
0,16417 Mit siner swaern stangen
0,16418 Swie Rennewart koeme gegangen
0,16419 Vor dem Markyse er doch lief
0,16420 Nu was da bi ein mos vil tief
0,16421 Da begunden sie an vliehen
0,16422 Rennewart dar nach in ziehen
0,16423 Er begunde so sere gahen
0,16424 Daz er in kam so nahen
0,16425 Daz er vil vaste nach in sluog
0,16426 Mit siner stangen die er truog
0,16427 In daz mos er nach in spra-c
0,16428 Daz er biz an die arme sanc
0,16429 Daz begunde in mueen sere
0,16430 Er sprach “Markys din ere
0,16431 An mir mit helfe prise
0,16432 Hilf mir gevange-n tshetise
0,16433 Daz mich die heiden iht toeten
0,16434 Kum ich von disen noeten
0,16435 Fuer war ich gedien ez so
0,16436 des werdent die heiden vnvro
0,16437 Keinen ich genesen laze”
0,16438 Nu hatte vf der straze
0,16439 Der Markys einen pedun
0,16440 Gevangen der hiez pilun
0,16441 Der was ein vil cleiner knabe
0,16442 Der Markys saz vil balde abe
0,16443 Von sinem Oershe volatine
0,16444 Vnd gab ez dem Sarrazine
0,16445 Willehalm begunde harte
0,16446 Gahen zu Rennewarte
0,16447 Da er in in dem Mose sach
0,16448 Rennewart iaemerlichen sprach
0,16449 “Markis Nu Ruoche Dich Genern
0,16450 Vnd von der heidenshefte wern
0,16451 Daz sie mir nemen nit den lip
0,16452 Du solt gedenken daz din wip
0,16453 Von art ist min swester
0,16454 Ez wart nie sorge vester
0,16455 danne Markys die ich dol”
0,16456 der Markys sprach “gehabe dich wol
0,16457 Ich loese dich von dirre not
0,16458 Oder ich blibe bi dir tot”

0,16459 Der Markis sich niht sumde
0,16460 Mit sime swerte er rumde
0,16461 daz moz von Rennewarte
0,16462 Mit beide henden harte
0,16463 Begunde er in do regen
0,16464 Beide ziehen vnd wegen
0,16465 Mit siner kraft vil vaste
0,16466 Biz er von kummers laste
0,16467 Von siner kraft erloeset wart
0,16468 “Nu lon dir got” sprach Rennewart
0,16469 “Markys du hast mir getan
0,16470 Die wile ich daz leben han
0,16471 So leist ich ymmer din gebot
0,16472 Du hast mir baz danne got
0,16473 Geholfen von dirre arbeit
0,16474 Vnd swaz ich ie durch dich gestreit
0,16475 Daz han ich vil wol bewant
0,16476 Ich sol durch dich mit miner hant
0,16477 Noch manigen werden heiden
0,16478 Von dem lebene sheiden”
0,16479 RENnewart da bi im sach
0,16480 Vliezen eine vrishe bach
0,16481 Gein dem bach er sa kerte
0,16482 Ich waen sin art in lerte
0,16483 Daz er abe twuog daz muor
0,16484 Wie Rennewart dannoch gefuor
0,16485 Des wil ich ivch bescheiden
0,16486 Rennewart begunde die heiden
0,16487 Suochen in maniger wise
0,16488 Mit dem werden Markyse
0,16489 Die werden fuersten zwene
0,16490 Begunden die Sarrazine
0,16491 Warten . als sie si ersahen
0,16492 Rennewart sprach “wir sueln sie hahen
0,16493 Vor Orense da mit eren
0,16494 Dem vil werden Terramern
0,16495 Sueln wir fuegen groze pine
0,16496 Vnd guneren die sarrazine
0,16497 daz wir komen sin in daz lant
0,16498 In en mag Mahmet noch Teruigant
0,16499 Niht gehelfen ich en welle
0,16500 Sie frumen in die helle
0,16501 Markys des wig gewis an mir
0,16502 daz ich Orense ledige dir
0,16503 daz ez nymmer me besezzen wirt
0,16504 Vnd manigen sterben nit verbirt”
0,16505 Da sie den heiden genahten
0,16506 Die fuersten balde gahten

0,16507 Vil gar si sie viengen
0,16508 Sie riten oder giengen
0,16509 Der heiden entran da nieman
0,16510 Mit seilen vnd mit riemen
0,16511 Bant man da die vil armen
0,16512 An beinen vnd an armen
0,16513 Vnd treip sie allesamet dan
0,16514 Ez waer Ros Oder Man
0,16515 Hin gein der burg Orangis
0,16516 do sprach der sueze Markis
0,16517 “Rennewart la din truren wesen
0,16518 Wir sueln beide nu genesen
0,16519 Ich han Orense ersehen
0,16520 Da vns sol liebes vil geshehen”
0,16521 “Daz wizze in kurtzer stunde
0,16522 Markis wol dinem munde
0,16523 Der saget so guote maere
0,16524 Ich wolte daz ich da waere
0,16525 Bi miner swester kyburge
0,16526 Wie gar sich danne burge
0,16527 Min vnuerborgene muede
0,16528 Ab minem rugge ich luede
0,16529 Manige groze arbeit
0,16530 Die ich in dem Mose leit”
0,16531 “REnnewart dins kummers not
0,16532 Div ist gar miner vrauden tot
0,16533 Der solt du vergezzen gar
0,16534 Vnd git got daz wir komen dar
0,16535 Da dich kyburg enphahen sol
0,16536 Die in vil kummerlicher dol
0,16537 Hat gelebt vil manige stunt
0,16538 Der sol nu werden vraeude kunt
0,16539 So sie vns sihet beide
0,16540 Zehant vnser herzeleide
0,16541 Die muoz von vns slafen gan
0,16542 Vnd vraeude bi vns bliben lan
0,16543 Wol mich kyburg so ich dich sihe
0,16544 Vngerne ich die vraeude lihe
0,16545 Jemanne dan mime libe
0,16546 Ich sol dem reinen wibe
0,16547 danken so ir swaern zit
0,16548 daz ir min dienst vraeude git”
0,16549 “Markys swa mit daz reine wip
0,16550 Ergetzet din getriwer lip
0,16551 Der not die sie erliten hat
0,16552 Din geprister lip des ere hat
0,16553 dar zuo gedien iz swa du wilt
0,16554 Ich han reiner wibe vil

0,16555 Gehoeret vnd dar zuo gesehen
0,16556 I n gehorte nie reine me geiehen
0,16557 Wibes ere dan man ir iach
0,16558 da man von wibes ere sprach
0,16559 Ich spriche ez durch die liebe niht
0,16560 daz ir min art zu swester giht
0,16561 Ich spriche ez von der warn tat
0,16562 daz gepristes lop ir loben hat”
0,16563 Der Markis danken nit versweig
0,16564 Rennewarte tief er do neig
0,16565 Vnd dankte im in manige wise
0,16566 Nu was Willehalm der Markis
0,16567 Vnd Rennewart komen die beide
0,16568 Zu ir lieben augenweide
0,16569 Was waz div augenweide
0,16570 Ob ich ivch des besheide
0,16571 Welt ir mir des sagen dang
0,16572 In beider herze do versang
0,16573 Von eime sheiden daz geshach
0,16574 Sit da einz daz ander sach
0,16575 Willehalm vnd div Marcgraeuin
0,16576 Da zergieng ir herzen pin
0,16577 Swa liep sin liep erblicket
0,16578 Der blic die not entstricket
0,16579 Vnd vliuhet Herzeleide
0,16580 Die sueze augenweide
0,16581 Heizet sie wider vrauden pflegen
0,16582 Ich waen ez tuot vil we der segen
0,16583 Den ein liep dem liebe tuot
0,16584 So vf sheiden stat ir muot
0,16585 Mit libe vnd mit herzen
0,16586 Ez zerfueret herzen smerzen
0,16587 So sie wider gesament sich
0,16588 Daz tuot wol daz waen ich
0,16589 Ein komen vnd ein suezer gruoze
0,16590 Machet daz leit rumen muoze
0,16591 swa die liebe gehuset hat
0,16592 Daz leit sie da nit bi ir lat
0,16593 Den zwein gelieben so geshach
0,16594 Ein komen ir beider leit zerbrach
0,16595 Nu hete kyburg einen site
0,16596 Der ir gerndem herzen wonte mite
0,16597 Daz sie vil dicke warten gie
0,16598 Vnd beidiv augen suochen lie
0,16599 Den Markis in vil vremde lant
0,16600 Biz sie den hochgepristen vant
0,16601 Vnd irn bruoder Rennewarten
0,16602 Sie bat die Ritter warten

0,16603 Vnd den reinen byshof Iohan
0,16604 “shawet was ich ersehen han”
0,16605 sprach sie “lieber herre min
0,16606 Wirt hie beswaert der muot min
0,16607 Div swaere muoz vil gar zergan”
0,16608 Do sprach der byshof Iohan
0,16609 “Mich dunket vrawe was ich sihe
0,16610 Daz sint lueete vnd tribent vihe
0,16611 Anders en kan ich niht ersehen
0,16612 Ich wil nit luege durch smeichen iehen
0,16613 Wan so waer ich triwen bar”
0,16614 “Herre byshof ir welt mir gar
0,16615 Daz herze fuellen pine
0,16616 Ich sihe vf volatine
0,16617 Dort her varN den Markis
0,16618 Vnd minen bruoder der manigen pris
0,16619 Hat bi siner zit erstriten
0,16620 Swaz ich arbeit han erliten
0,16621 Div wirt mir nu vil gar benomen
0,16622 Ich sihe zwene man dort komen
0,16623 Der ellen mich kan sheiden
0,16624 Von langen herzeleiden”
0,16625 Der byshof Iohan aber sprach
0,16626 “Min herze daz dolt vngemach
0,16627 Kyburg liebe vrawe min
0,16628 Ich vuerhte ez sin sarrazin
0,16629 Vnd haben genomen einen raup
0,16630 Ich sihe einen grozen staup
0,16631 Vor in triben vil harte
0,16632 Ich sihe dort Rennewarte
0,16633 In siner hant die gerte
0,16634 Div vor dem tode vns nerte”
0,16635 Kyburg div vil reine sprach
0,16636 Der man vil maniger guete iach
0,16637 “Ich wil iv sagen minen wan
0,16638 Vil reiner byshof Iohan
0,16639 Ez ist also ergangen
0,16640 Der Markis hat gevangen
0,16641 Die heiden binamen vf der vart
0,16642 Er vnd min bruoder Rennewart
0,16643 Vnd gesehet ir wol in kurtzer vrist
0,16644 Daz Min Rede War Ist”
0,16645 Da mit der Markis nit vermeit
0,16646 Gein Orense er balde reit
0,16647 daz er vant vil wol behuot
0,16648 Der Ritter triwe was so guot
0,16649 Vnd ir muot da bi so staete
0,16650 Den er z enpfolhen hete

0,16651 Die heten . e . verlorn ir leben
0,16652 E . ez ieman waer gegeben
0,16653 Kyburg leides vil verlos
0,16654 da sie den Markis rehte erkos
0,16655 Mit ir bruoder Rennewarte
0,16656 Sie begunden gahen harte
0,16657 Hin gein der porte sie lief
0,16658 Die sie vf vil wite swief
0,16659 In bluete stuont ir vraeuden ris
0,16660 Sie lie niht den Markys
0,16661 Erbeizen vf die erden
0,16662 E . sie den gepristen werden
0,16663 Kuzte lieplich vnd suoze
0,16664 Mit so getriwem gruoze
0,16665 Man selten mich enpfahet
0,16666 So getriwer gruoze versmahet
0,16667 Von wiben vnd von mannen mir
0,16668 Da von ich nit me sagen dir
0,16669 A we swes gruoze sich geroetet
0,16670 Vnd der gebaerde sich noetet
0,16671 Daz er zeige sich ze vruende
0,16672 Der mueze mit dem muende
0,16673 Vnd sine genozen werden erhangen
0,16674 Wie Rennewart wart enpfangen
0,16675 Von siner swester libe
0,16676 Da en wart nie man von wibe
0,16677 Enpfangen noch gegruezet baz
0,16678 Die reine kyburg nit vergaz
0,16679 Sie en buete ez ir bruoder wol
0,16680 Vnd sprach “min kummerlicher dol
0,16681 D’ ist nu gar verendet
0,16682 Sit dich got hat gesendet
0,16683 Min angst ist nu cleine”
0,16684 Die Ritter algemeine
0,16685 Enpfingen die fuersten beide
0,16686 Mit vraeuden sunder leide
0,16687 Wurden sie wol gegruezet
0,16688 Mit worten gar gesuezet
0,16689 Der reine byshof Iohan
0,16690 Des triwe kunde da nit lan
0,16691 Er enpfinge sinen toten
0,16692 Mit gruoze dem valsh was verboten
0,16693 Vnd den Markys willehalmen
0,16694 Von reines gruoze galmen
0,16695 Wart da ein lut gedoene
0,16696 Den gruoze an reine ich kroene
0,16697 Hoher danne keinen gruoze
0,16698 Kyburg sprach “nu ist vns buoze

0,16699 Swaz vns leides ie gewar
0,16700 Markys din zuht dar an bewar
0,16701 Dine staete la nit wanken
0,16702 du solt mit vlize danken
0,16703 Disen rittern allensament
0,16704 Ir triwe ir staete sich nit shament
0,16705 Als sie hant behalten din gebot”
0,16706 Der Markis sprach “der sueze got
0,16707 Mueze lonen in der pflege
0,16708 Vnd wissen sie des hymels wege
0,16709 Vnd waer Ich Herre Vb’ Alliv La-t
0,16710 Ob in gaebe div gar min hant
0,16711 Da mit waer in gelonet niht
0,16712 Der arbeit als ir dienst giht”
0,16713 Da mit sie fuorn enbizzen
0,16714 Kyburg sich kunde vlizzen
0,16715 Wie ez in wuerde wol erboten
0,16716 Beide gebraten vnd gesoten
0,16717 Gab man in vrisher spise genuog
0,16718 Mit zuechten man die fuer sie truog
0,16719 “Nu lob ich z got” sprach Rennewart
0,16720 Daz mir der mangel ist verspart
0,16721 Des ich lange han gepflegen
0,16722 Ich han manige naht gelegen
0,16723 Daz ich grozes hungers pflac
0,16724 Nu wirt erfüellet hie min sac
0,16725 Vnd so wol gar gemezzen
0,16726 Daz ich nit me mag ezzen
0,16727 D est war ich wil mich erholn
0,16728 Daz ich mir selber han verstoln
0,16729 Sit ich von mime closter fuor
0,16730 Mich hete verderbet nach daz muor
0,16731 Da ich inne gesteket was
0,16732 swester wizze daz ich genas
0,16733 Des half mir der Markys
0,16734 Ist min triwe an staete wis
0,16735 Ich sol ez gelten im also
0,16736 daz ez wirt div heidenschaft vnvro
0,16737 Des bit ich mir sol helfen got
0,16738 Ich getrenke in in ir spot
0,16739 Sie muozen mir dar vmme geben
0,16740 Beide ir guot vnd ir leben
0,16741 Der rede danket im harte
0,16742 Der Markys Rennewarte
0,16743 Vnd kyburg div vil reine
0,16744 Die Ritter algemeine
0,16745 Dankten im vil vaste
0,16746 Daz er sie kummers laste

0,16747 Mit siner helfe wolt entladen
0,16748 Vnd den heiden fuegen shaden
0,16749 Da die herren shone gazen
0,16750 Willehalm der wolt nit lazen
0,16751 Rennewart mueste slafen gan
0,16752 Vnd gemach bi siner swester han
0,16753 Rennewart da nit ruowe en vloch
0,16754 Ab im er daz harnash zoch
0,16755 Vnd leite sich an ein bette
0,16756 Siner sorgen der wart wette
0,16757 Da er gemaches solte pflegen
0,16758 Min kunst vil kume kan an legen
0,16759 Die not die sie beide litten
0,16760 Manig helm wart von in versniten
0,16761 Da sie anderweide vahten
0,16762 Mit den heiden die sie brahten
0,16767 Als ich ivch des besheide
0,16768 Do die fuersten shone beide
0,16769 Die muede gar veberwunden
0,16770 Wes sie dar nach begunden
0,16771 Daz werdent wildiv maere
0,16772 Vnd zu sprechen also swaere
0,16773 Daz ich da gein angest pflige
0,16774 Ob ich div maere nu verswige
0,16775 Wie sit die fuersten wurben
0,16776 Vnd was heiden von in sturben
0,16777 So truege ich der guoten haz
0,16778 Willehalm D' Markys Niht V'gaz
0,16779 Die gevangen er behalten hiez
0,16780 Bi dem leben er sie liez
0,16781 Vntz er daz versuohte
0,16782 Ob ir keinr des geruohte
0,16783 Daz er sich wolte taufen
0,16784 da mit daz leben kaufen
0,16785 Was willehalm der Markis
0,16786 Nu veste vn- mit sinnen wis
0,16787 des was im nie so durft
0,16788 Sin angest hat den wurf
0,16789 Gewunnen gein vil hohem spil
0,16790 Der heidenshefte was so vil
0,16791 Daz ich ir nit wol geachten kan
0,16792 Doch was vnder in so stark ein man
0,16793 Daz kein man nie sterker wart
0,16794 Weder Baldewin noch Rennewart
0,16795 Der enweder soelher sterke pflag
0,16796 Als div an Malfer lag
0,16797 Dem shoenen vnd dem ivngen
0,16798 Vnd solten alle zungen

0,16799 Beide man dar zu div wip
0,16800 An shone loben sinen lip
0,16801 Er belibe an dem lobe
0,16802 Malfers shoene div lag obe
0,16803 Swaz shoene an allen mannen lag
0,16804 Da mit daz lob ich lazen mag
0,16805 Willehalm sprach zu Rennewart
0,16806 diner helfe mir noeter nie wart
0,16807 danne nu zu dirre stunde
0,16808 Daz ich dich kunde funde
0,16809 Des lob ich der maegde kint
0,16810 Dem alle kint erkennen sint
0,16811 Vnd nieman mag wider in genesen
0,16812 Vngenesen waern wir gewesen
0,16813 Von eines mannes krefte
0,16814 Sin kraft der heidenshefte
0,16815 Von vns gar vride baere
0,16816 Ob nit din lip hie waere
0,16817 du niht breche wan den tot
0,16818 So muesten doln wir die not
0,16819 Daz hat erwendet gar die va't
0,16820 Zu dem Markise sprach Rennewa't
0,16821 "Willehalm gehabe dich wol
0,16822 Ir kraft ich gar enkreften sol
0,16823 Die koment gein vns veber mer
0,16824 Mit eime kreftigen her
0,16825 Vnd ir Risen den starken
0,16826 Swaz ir kyele vnd ir barken
0,16827 Tragent daz ist vnser eigen
0,16828 Daz wil ich dir erzeigen
0,16829 Vil gar in kurzer stunde
0,16830 daz vershyr vn- Tremu-de
0,16831 Muezen gar hie bliben
0,16832 Ich wil aber tuon den wiben
0,16833 Leit vnd herzeser als . e .
0,16834 Sie muoz iamer twingen me
0,16835 Der netzen kan div wange
0,16836 Mir breste danne div stange
0,16837 Die ich brahte mit mir her
0,16838 Willehalm ez ist min ger
0,16839 Daz ich mit dem Risen vehte
0,16840 Ich weiz wol tuot got rehte
0,16841 So git sin helfe mir den sige
0,16842 Gedenke daz ich mich verzige
0,16843 Durch In vil Maniger Richeit
0,16844 Min vater noch vil der lande heit
0,16845 Vnd waltet maniger krone
0,16846 Hat er die von Hamone

0,16847 Oder lehe s im keines hant
0,16848 Oder der valshe Teruigant
0,16849 Oder lehe s im Appolle
0,16850 Er git da von zu zolle
0,16851 Die sele so er tot gelit
0,16852 daz got den sinen niht en git
0,16853 Vferde so riches guot
0,16854 Ich waen er dar ane missetuot
0,16855 daz er dem kan richeit geben
0,16856 der niht ruochet kristen leben
0,16857 Vnd niht an in gelaubet
0,16858 Daz Terramer in raubet
0,16859 Daz er im daz so lange vertreit
0,16860 Markis fuer war daz ist mir leit
0,16861 Ch weiz fuer war daz Terramer
0,16862 Gerne richet die herzeser
0,16863 Die ich vf alytshantz im tet
0,16864 In beshirmet nymmer Mahmet
0,16865 Ich welle sie im meren
0,16866 Div wip vil iamers leren
0,16867 Daz ich ir diener lege tot
0,16868 Reine wip die lident not
0,16869 Durch liebes vriundes sterben
0,16870 Markis ich slahe den sherben
0,16871 Durch der Sarrazine helm
0,16872 da von bluotig wirt der Melm
0,16873 Vnd muoz daz der Rise wesen
0,16874 Wir zwene lan sin nit genesen
0,16875 Ich vnd den div maget gebar
0,16876 Markis wir sueln senden dar
0,16877 Vnd den Risen heizen biten
0,16878 Daz von vns zwein werde gestriten
0,16879 Fuer kristen vnd fuer heiden
0,16880 Vnd swer da vnder vns beiden
0,16881 Den andern tot gevalte
0,16882 Daz der sigehaft von gewalte
0,16883 Dar nach gar sicher waere
0,16884 Ob dir behaget daz maere
0,16885 Willehalm so dunket ez mich guot
0,16886 Vnd hat got sinen muot
0,16887 So weiz ich wol daz ich gesige
0,16888 Got vngerne mir verzige
0,16889 Siner helfe wan ich sin kempfe bin
0,16890 Nu rate du wen wir senden hin
0,16891 Vnd ez gewerben kuenne
0,16892 Got mir der gnaden guenne
0,16893 Daz man vns der bete gewer
0,16894 Der ich vf gotes helfe ger”

0,16895 “O we lieber Rennewart
0,16896 We mir daz ich ie wart
0,16897 Wie ich vuerhte dins libes
0,16898 Ob du da tot belibes
0,16899 So ist div kristenheit tot
0,16900 Got bedenke mine not
0,16901 Vnd die sorge div mich twinget”
0,16902 “Markis min helfe dich bringet
0,16903 Von leide in vil kurtzer vrist
0,16904 Ich weiz wol daz der sueze krist
0,16905 Mit mir stritet disen strit
0,16906 Markys so solt du von der zit
0,16907 ymmer leben mit gemache”
0,16908 “Vil Suezer Got Nu Wache
0,16909 Veber sie die sint die dine
0,16910 Vnd la die sarrazine
0,16911 Veber vns gewinnen keinen gewalt
0,16912 Ich weiz fuer war daz Tybalt
0,16913 Vnd mag er ez gezechen
0,16914 Mich heizt radebrechen
0,16915 Vnd kyburge die swester din
0,16916 Ich gewan nie me so grozen pin
0,16917 Vor aengsten ich gar switze”
0,16918 “Willehalm daz nit entsitze
0,16919 Daz der Rise ist so starg
0,16920 Dem sich nie niht vor verbarg
0,16921 Der ist bi mir in der not
0,16922 Ich weiz fuer war daz er bot
0,16923 Fuer vnsern tot sin reines leben
0,16924 Er kan wol trost den sinen geben
0,16925 Vnd den vinden sinen haz
0,16926 Markys ich wil niht fuerbaz
0,16927 Sprechen wan ez muoz geshehen
0,16928 Got mag wol mit eren iehen
0,16929 Daz fuer in sin kempfe vehte
0,16930 Nach zweir hande rehte
0,16931 Sin gebot die welt hiez werden
0,16932 Vnd den hymel vnd die erden
0,16933 Ich weiz auch wol daz sin gewalt
0,16934 Manige hohuart hat gestalt
0,16935 Vnd hoch daz nider machet wol
0,16936 Sin helfe mir des helfen sol
0,16937 Daz ich genider die hohuart
0,16938 Div nie mit sinem willen wart
0,16939 Der Terramer nu lange pfliget
0,16940 Ich weiz fuer war daz got gesiget
0,16941 Gotes kraft mit miner hende
0,16942 Vnser kummer nimt ein ende

0,16943 Ane zwiuel ich des bin
0,16944 Markis nu sende balde hin
0,16945 Vnd sih ob ez geshehen muege
0,16946 Ich versuoche ob min kraft iht tuege
0,16947 Vnd got behabe sin reht an im
0,16948 Dem ich mit strite sin leben nim”
0,16949 “Herre byshof Iohan sprich
0,16950 Waz guot dar vmme dunket dich”
0,16951 “Markis herre daz ist min rat
0,16952 Des Rennewart gemuotet hat
0,16953 Daz man im des volgen sol
0,16954 Vraget sie die iv vil wol
0,16955 Hant gedienet vnd behuot
0,16956 Orense . ob ez sie dunke guot”
0,16957 Der Markys vraget die Ritter gar
0,16958 Dueht ez sie guot er sante dar
0,16959 Sie sprachen alle “ez ist guot getan
0,16960 Nu ratet byshof Iohan
0,16961 Wen wir zu boten senden dar
0,16962 Der vns div maer reht ervar
0,16963 Einen hohen man der so wis
0,16964 Si .” do sprach der Markys
0,16965 “Ich sage iv wie min wille stat
0,16966 Vnd ist ez danne iwer rat
0,16967 So erkenne ich bi im einen man
0,16968 Der mir vil wol guotes gan
0,16969 Vnd zuo mir ruchet riten her”
0,16970 “Herre Markys wer ist der
0,16971 Den du erkennest vnder den heiden
0,16972 Des ruoche mich bescheiden”
0,16973 “Ich Tuon Er ist Von Belmunt
0,16974 Vnd von hoher art mir kunt
0,16975 Vnd ist kruchan genamet
0,16976 Sin pris der arte sich nit shamet
0,16977 Er ist mir in triwen holt
0,16978 Rennewart du naemd im groz golt
0,16979 Daz Terramere was gesant”
0,16980 “Markys er ist mir wol bekant
0,16981 din rat der dunket mich vil guot
0,16982 Ob ez sam die andern tuot”
0,16983 Do sprach der Byshof Iohan
0,16984 Vnd die andern “ez ist guot getan”
0,16985 Do div volge da geshach
0,16986 Vnd ez nieman widersprach
0,16987 Der Markis einen boten nam
0,16988 D’ im daz warb vn- rehte kam
0,16989 Hin zu kruchan er den sante
0,16990 Vnd sprach daz er in mante

0,16991 Der triwen der sie ie pflagen
0,16992 Vnd sich der nie bewagen
0,16993 Daz er der niht zerbraeche
0,16994 Vnd vil gahens in gespraechen
0,16995 Er bedoerfte sin zu grozer not
0,16996 Swaz der Markys enbot
0,16997 Kruchane vnd sagen hiez
0,16998 Der bote des niht en liez
0,16999 Er en wuerbe ez endelichen gar
0,17000 Kruchan sprach "vil gern ich var
0,17001 Swar sin gebot gebiutet mir
0,17002 A we vnd waern bede wir
0,17003 Als wir warn ze pulmachis
0,17004 Da er beiagte hohen pris
0,17005 Mit maniger tyoste die er tet
0,17006 Saget im ich leiste sine bet
0,17007 Gern vnd dar zu shiere
0,17008 Ich diene dem kuenge Roiere
0,17009 Niht gerner dan dem suezen
0,17010 Ich wolte daz ich gebuezen
0,17011 Gar moehte swaz im wirret
0,17012 Des waer er vnuerirret"
0,17013 Da mit der bote vrlaup nam
0,17014 Als siner fuege wol gezam
0,17015 Vnd gahet wider gein Orangis
0,17016 Da er vant den werden Markis
0,17017 Dem er vil shone sagete
0,17018 Daz kaeme der vnuerzagete
0,17019 Hin zu im in kurzer stunde
0,17020 Vnd sprach daz er im erbunde
0,17021 Waz im fuegete herzeleit
0,17022 Oder krenkte an wirdekeit
0,17023 Der Markis dankte im vil sere
0,17024 Daz er im erbot die ere
0,17025 Vnd daz er leiste sine ger
0,17026 Hie mit sach man riten her
0,17027 Kruchanen der vil triwen pflag
0,17028 An im mer triwen lag
0,17029 Dan an vil kristen die ich weiz
0,17030 Der ieslicher buwet disen kreiz
0,17031 Do kruchan zu Orense reit
0,17032 Willehalm der Markis nit v'meit
0,17033 Er en waere da ererbeizte
0,17034 Dar zu div liebe in reizte
0,17035 Kruchan der vil werde
0,17036 Erbeizet was vf die erde
0,17037 Der Marcgraue da niht liez
0,17038 Vil guetlich Er den werden Hiez

0,17039 Mit triwen willekomen sin
0,17040 Vnd fuort in zu der Marcgraeuin
0,17041 Div soelich gruezen niht en liez
0,17042 Als sie der Markys gruezen hiez
0,17043 Ob was mit kusse div geshiht
0,17044 Da von kan ich gesagen niht
0,17045 DEr Markis sprach zu kruchan
0,17046 “War v-me ich dich besendet han
0,17047 Suezer man daz ruoche vernemen
0,17048 Vnd la din triwe des gezemen
0,17049 Daz du mir gebes disen rat
0,17050 Div heidenschaft Orense hat
0,17051 Besezzen nu vil lange
0,17052 Doch nit mit dem getwange
0,17053 Ich rite dr uf vnd wol dr abe
0,17054 Nu shawe wen ich habe
0,17055 Braht . der mich vil wol ernert
0,17056 Vnd vil der heiden lebens verzert”
0,17057 “Herre Markis wer ist der
0,17058 Daz ich in geshawe daz ist min ger”
0,17059 “Sin lip der ist dir vnuerspart
0,17060 Ez ist min swager Rennewart
0,17061 Den ich da zu prides lie”
0,17062 La mich in sehn . sich er ist hie
0,17063 “Ich wil in gerne bringen dir
0,17064 Da er nu ivngest shiet von mir
0,17065 Da zu sancte Iuliane
0,17066 da was ich in dem wane
0,17067 Daz ich in gesahe nymmer me
0,17068 Er shuof vil heiden in den se
0,17069 Vf eime shiffe des ich pflag
0,17070 Da vil goldes inne lag
0,17071 Daz nam er vnd vil spise
0,17072 Dar vmme ich in doch prise
0,17073 Daz mir sin lip da liez daz leben
0,17074 Vnd mir der spise geruochte geben
0,17075 Daz ich ir niht wolte mere
0,17076 Mit grozem herze sere
0,17077 Min herze da was bevangen”
0,17078 Da kam Rennewart gegangen
0,17079 Als er kruchan ersach
0,17080 Sinen gruoze er gein im sueze sprach
0,17081 Kruchan im groz danken bot
0,17082 Kruchan sprach in grozer not
0,17083 “Ich nu ivngest bi iv was
0,17084 Da luetzel heiden vor iv genas
0,17085 Die mit mir warn komen dar
0,17086 Herre swaz iv ie gewar

0,17087 Von mir leides daz ist mir leit
0,17088 Zu buosze bin ich iv bereit
0,17089 Dienstes der iv giltet daz
0,17090 Swie ich kan gefuegen daz”
0,17091 Kruchan gein den worten neig
0,17092 Da mit ir beider munt gesweig
0,17093 DEr Markis sagte in sinen muot
0,17094 Vn- swaz in drumme duehte guot
0,17095 Daz er im daz sagete
0,17096 Da sprach der vnuerzagete
0,17097 Daz er mit im sante dar
0,17098 Einen boten der des naeme war
0,17099 Vnd wol erkennen kuende
0,17100 Welh antwuerte er da fuende
0,17101 Do sprach der Markys “daz tuon ich
0,17102 Ir herren nu suelt ir wisen mich”
0,34424 “Du Muezest In in Kurtzer Vrist
0,34425 Vinden . des gan ich dir wol
0,34426 Din munt mir in nennen sol”
0,34427 “Ez ist willehelm der Markys
0,34428 Durch den hat der kuenc Loys
0,34429 Herre tusent boten gesant
0,34430 Man suochet in veber aelliv lant
0,34431 Die hant den tauf enpfangen”
0,34432 “Du bist gar wol gegangen
0,34433 Ich bin willehelm genant
0,34434 Min lip sich cleine hat geshant
0,34435 Daz div Roemshe kuenigin
0,34436 Von arte kan min swester sin
0,34437 Sage mir was Loyse werre”
0,34438 Er sprach “vil lieber herre
0,34439 Die heiden sint her veber mer
0,34440 Komen . mit einem grozen her
0,34441 Vnd hant belegen Paris
0,34442 Vnd sit ir z der Markys
0,34443 Wie sit ir danne sus gedigen
0,34444 Der witze ist iv verzigen
0,34445 Daz ir alsus nacke-t gat
0,34446 Vnd niht an iv gewandes hat”
0,34447 “Ez hant zerzerret die dorne”
0,34448 Willehelm der hochgeborne
0,34449 Sprach . “ich han die sinne gar
0,34450 Daz ich bin gewandes bar
0,34451 Daz machet daz min kranker lip
0,34452 Nie gesach man oder wip
0,34453 Daz wizze in fuenf iaren
0,34454 Wie welt ir danne gebaren
0,34455 Komet ir da luete sint

0,34456 Herre sehent ivch div kint
0,34457 Da von ershricket in der muot
0,34458 Daz ez in gar vnsanfte tuot”
0,34459 “HErre ich han geshimpfet vil
0,34460 An iw’ gnade ich sprechen wil
0,34461 Ob ir z sit der Markys
0,34462 So hoehet erste iwarn pris
0,34463 Helfet wern vns daz lant
0,34464 Vnd werde nit der tauf geshant
0,34465 Div tat ivch hohe priset”
0,34466 “Sage an wer hat dich gewiset
0,34467 Also rehte zuo mir her”
0,34468 “Ich waene wol ez taete der
0,34469 Der alliv ding erkennet gar
0,34470 Ob ich mit dir von hinnen var
0,34471 War sueln wir danne keren
0,34472 Kanst du mich daz geleren”
0,34473 “Lieber herre ich en kan ez niht
0,34474 Min lip im des lere giht
0,34475 Der genant ist div Trinitat
0,34476 Mich da her gewiset hat
0,34477 Er ist vor allen witzen wis”
0,34478 Do sprach willehelm der Markys
0,34479 “Volge mime rate
0,34480 Ez ist talang zu spate
0,34481 Bliben hie biz morgen
0,34482 Vns enbindet lihte von sorgen
0,34483 Der dich da wiste her zuo mir
0,34484 Ich tuon swaz gebietet ir”
0,34485 “Daz wizzet lieber herre guot
0,34486 Ez stet also swaz ir tuot
0,34487 Des bin ich iv gehorsam”
0,34488 Der garzun sinen brief nam
0,34489 Vnd Gab In Willehelme Dar
0,34490 Er sprach “ich weiz div maere gar”
0,34491 “Ist ieman vor mir komen . e .”
0,34492 “Nein ez niht da dir was we
0,34493 Den brief ich vz der buehsen nam
0,34494 Da ih n gelas min hertze erkam
0,34495 Daz mir nah was gewunden
0,34496 Paris daz wirt enbunden
0,34497 Gar von des kummers bande
0,34498 Vinde ich sie im me lande”
0,34499 DER Markys do des nit en lie
0,34500 Gein sime huse er do gie
0,34501 Daz was gar ane spise
0,34502 Do sprach zu dem Markyse
0,34503 Der kneht “ich bin in grozer not

0,34504 Vnd vil nahen von hunger tot
0,34505 Trut geselle min nu bit
0,34506 Biz daz ez kome an die zit
0,34507 Daz ez vns got berate
0,34508 Got herre daz tuo drate”
0,34509 Sprach der Garzun vnd saz
0,34510 “Habt ir keiner slahte maz
0,34511 Wan als ez iv got beshert
0,34512 Wer ist der die lute nert”
0,34513 Do sprach zu im der Markys
0,34514 “Daz tuot der hat daz paradys
0,34515 Der kan geben vnd nemen”
0,34516 Nu kunde in des gezemen
0,34517 Daz er dem Markyse sin reht
0,34518 Sante . do ersach der kneht
0,34519 Daz brot vnd gute trahte
0,34520 Niht langer er do mahte
0,34521 Gebiten . er en aeze
0,34522 Ob der here geist vergaeze
0,34523 Daz er was selb ander
0,34524 Niht . ir beider spise vand er
0,34525 Was daz niht ein zeichen
0,34526 Der kneht begunde reichen
0,34527 Zu dem fuersten in daz vaz
0,34528 Daz liez der fuerste ane haz
0,34529 Vnd tet im alle maze wol
0,34530 Der kneht wart guoter spise vol
0,34531 Vnd dar zuo er vil vaste trank
0,34532 Vnd sprach . er habe ymmer dank
0,34533 Der vns so wol beriete
0,34534 Der vater dem svne gebiete
0,34535 Daz er morne daz selbe tuo
0,34536 Vnd daz geschehe vil vruo
0,34537 DEr Markys guetliche sprach
0,34538 “Lieber vriunt nu habe gemacht
0,34539 Hinaht als ez wesen mege
0,34540 Vnd lig als ich mich selben lege”
0,34541 Der kneht sprach “ich han genuog”
0,34542 Div augen er zusamne sluog
0,34543 Von der muede er shier entslief
0,34544 Der Markys hin zu gote rief
0,34545 Mit hertzen er in mante
0,34546 Daz er im sine gnade sante
0,34547 Vnd im daz geruohte enbarn
0,34548 Ob er dannen soelte varn
0,34549 Oder da beliben mer
0,34550 “Du solt tuon den hinker”
0,34551 Alsus sprach ein stimme dar

0,34552 Da er was entslafen gar
0,34553 Din lip nymmer girret
0,34554 Vnd wizze Swaz dir Wirret
0,34555 Daz dir got der vil sueze
0,34556 Mit siner helfe daz bueze
0,34557 Vnd dich nymmer wil verlan
0,34558 Daz wizze wares svnder wan
0,34559 Da mit div stimme gesweig
0,34560 Willehelmes hertze hoher steig
0,34561 Von dem troste der im was
0,34562 Komen . der heizet Messyas
0,34563 Des morgens da der tag vf gie
0,34564 Willehelm do des niht en lie
0,34565 Er huebe sich vf sine vart
0,34566 Die im von gote was entspart
0,34567 Daz er die kristen loste
0,34568 Mit siner gnaden troste
0,34569 Willehelm kunde des nit lan
0,34570 Swa er ein vncrut sach stan
0,34571 Daz er hete getreten nider
0,34572 Daz rihte er shone hin wider
0,34573 Swa er danne ein crut sach
0,34574 Dem man guoter arte iach
0,34575 Daz liez er ligen als ez lag
0,34576 War vmme er der taete pflag
0,34577 Daz kan ich iv gesagen wol
0,34578 Als ih z nu sagen sol
0,34579 vch duhte lihte gar zu lang
0,34580 Sagte ich iv den vmmegang
0,34581 Den er in dem walde tet
0,34582 Vil manige venie vnd gebet
0,34583 Tet er in sinen iaren
0,34584 Sine sinne niht verbaren
0,34585 Sie en dienten gote vil sere
0,34586 Nach siner gnaden lere
0,34587 Gieng er vil gar ane vrage
0,34588 Vil balde vnd niht trage
0,34589 Biz er kam fuer den walt
0,34590 Da wart sa von im entwalt
0,34591 War vmme . daz wil ich iv sagen
0,34592 Er sprach . “wilt u nu beiagen
0,34593 Groz guot an kuenig Loyse
0,34594 So tuo als ich dich wise”
0,34595 Daz riet er sime gesellen
0,34596 Er sprach “ich wil entwellen
0,34597 Daz ist gar min wille
0,34598 Sihest du dort die ville
0,34599 Dar inne wil ich din beiten

0,34600 Heiz mir den kuenc bereiten
0,34601 Guetiv cleit von sharlachen
0,34602 Dar zuo heiz mir me machen
0,34603 Ein hemde vnd ein nidercleit
0,34604 Vnd sol daz shiere sin bereit
0,34605 Du solt mir me noch bringen
0,34606 Volatinen vnd muege er springen
0,34607 Ich getruwe wol Loyse
0,34608 Daz er mit guoter spise
0,34609 In habe behalten
0,34610 Vnd kan er triwe walten
0,34611 Er leistet swaz er dir gehiez
0,34612 Da er dich sendens niht erliez”
0,34613 DEr Garzun tet des er in bat
0,34614 Ich waen er cleiner tritte iht trat
0,34615 Er begunde wite shriten
0,34616 Vil gar in kurtzen ziten
0,34617 Kam er zuo Loyse hin
0,34618 Vnd sprach “ich weiz wol daz ich bin
0,34619 Herre . Iv vnd Gote Willekomen
0,34620 Als ir div maere hat vernomen
0,34621 Div ich bringe in diz lant
0,34622 Mich hat her vor zu iv gesant
0,34623 Der werde Markys willehalm
0,34624 Ir gehortet nie so gerne galm
0,34625 Gen vz keinem munde
0,34626 Herre in langer stunde”
0,34627 “Bon mey tsheitis nu sage an
0,34628 Hast du funden den werden man
0,34629 So ist dir wol gelungen”
0,34630 Die Ritter dar naher drungen
0,34631 Waz er maere sagete
0,34632 “Vil saelden dir ertagete
0,34633 Ob din lip den werden vant
0,34634 Vnd ist er komen in diz lant
0,34635 Daz ruoche mir shiere wizzen lan
0,34636 Swaz ich dir gelobet han
0,34637 Des wirt din lip von mir bereit
0,34638 Daz wizze mit der warheit”
0,34639 “Herre kan ivch des gezemen
0,34640 Daz ir gerne woellet vernemen
0,34641 Waz er iv bi mir enbot
0,34642 Cleider von sharlachen rot
0,34643 Suelte ir im shiere senden
0,34644 Mich dunket er welle wenden
0,34645 Swaz iv die heiden leides tuont
0,34646 Stet sin muot noch als er stuont
0,34647 Da er mich von im sante

0,34648 Vil vaste er mich do mante
0,34649 Daz im balde waer bereit
0,34650 Ein hemde vnd ein nidercleit
0,34651 Vnd daz ir liezet shinen
0,34652 Iwer triwe vnd volatinen
0,34653 Im sendet . muege er springen
0,34654 So sol ich im in bringen
0,34655 Daz sol geshehen shiere
0,34656 Vil cleiner mile viere
0,34657 Sint dar herre da ich in liez”
0,34658 Der kuenc Loys balde hiez
0,34659 Daz oersh volatinen holn
0,34660 Man sach nie deheinen voln
0,34661 Wiltlicher me gebaren
0,34662 Der waer von siben iaren
0,34663 Er was veizt vnd wol gereht
0,34664 Do daz ersach der kunde kneht
0,34665 Er sprach “nu ist iwer not
0,34666 Zergangen . wan sie muezen tot
0,34667 Ligen . swelhe sint heiden
0,34668 So bin ich von im gescheiden”
0,34669 Daz maer harte lute ershal
0,34670 In der heiden her veberal
0,34671 Daz der Markys komen waere
0,34672 Daz wart in also swaere
0,34673 Daz sie ez entsazen sere
0,34674 Der was von Terramere
0,34675 Geborn . da von sorge kam
0,34676 Daz ez im gar die vraeude nam
0,34677 Daz was der kuenc Matribuleiz
0,34678 Loys sich mit vlize vleiz
0,34679 Daz er den Markysen
0,34680 Den hochgepristen wisen
0,34681 Wolte also enpfahen
0,34682 Daz augen nie gesahen
0,34683 Ritter an siner komenden vart
0,34684 Der ie Baz Enpfangen Wart
0,34685 Nv liez Loys die heiden
0,34686 Ane taedinge von im sheiden
0,34687 Vnd sprach “hoeret minen sin
0,34688 Gar ane angest ich des bin
0,34689 Ir muezet ivch hinnen sheiden
0,34690 Mit hertzlichen leiden
0,34691 Sit der Markys ist komen
0,34692 Sin kunft hat mir benomen
0,34693 Swaz mir leides ie geschach”
0,34694 Ein heiden wert hin tz im sprach
0,34695 Welt ir den Markys gesehen

0,34696 So lat herre daz geshehen
0,34697 Daz wir n mit iv shawen
0,34698 Des hant hat verhawen
0,34699 Vil manigen helm vnd shilt
0,34700 An prise nieman fuer in zilt
0,34701 Fuer war der ie cristen wart
0,34702 “Ich wil erlauben iv die vart”
0,34703 Sprach kuenc Loys nu wol dan
0,34704 “Gnade reine saelig man
0,34705 Daz wir des iwer vrlaub han”
0,34706 Bomesheitis kam gegán
0,34707 Vnd sprach hin zu Loyse
0,34708 “Herre ir n sit nit wise
0,34709 Daz ir beitet hie so lange
0,34710 Ich vuerhte daz belange
0,34711 Den Markysen sere”
0,34712 Der kuenc beite niht mere
0,34713 Gein dem Markyse er reit
0,34714 Der bote sprach “ich wil ditz cleit
0,34715 Vor dar fuern daz ist guot
0,34716 Daz er sie an sich getuot
0,34717 E . ir komet da ich in liez”
0,34718 Volatinen er do hiez
0,34719 Im dar geben an die hant
0,34720 Vnd reit hin da er den vant
0,34721 Der was vor shanden wol bewart
0,34722 Der hete daz har vnd den bart
0,34723 Wol gestraelt vnd getwagen
0,34724 “Disiv cleider suelt ir tragen”
0,34725 Sprach bomesheitis vnd bot sie dar
0,34726 Ein hemde klein wis gevar
0,34727 Vnd dar nach ein nidercleit
0,34728 Einn nidergurt der fuerste heit
0,34729 Den gab im div Margraeuin
0,34730 Den zoch der reine selbe dar in
0,34731 Zwuo hosen leit er an div bein
0,34732 Ab den rote varwe shein
0,34733 Da er getet div cleider an
0,34734 Ez en wart nie baz geshicket ma-
0,34735 Dan da er sich gegurte
0,34736 Der bote im da antwurte
0,34737 zwene sporn harte guot
0,34738 Vnd einen rich geworhten huot
0,34739 Den satzte vf der fuerste wert
0,34740 Er bot im dar sin liebes swert
0,34741 Daz tshoyse was genant
0,34742 Der fuerste nam ez in die hant
0,34743 Vnd begunde sin ecken shawen

0,34744 Er sprach "du hast verhawen
0,34745 Manigen helm vnd shilte vil
0,34746 Aber ich daz versuochen wil
0,34747 Ob ich die cristen muege ernern
0,34748 Vnd heiden vil den tot beshern"
0,34749 Man Zoch Im Volatinen Dar
0,34750 Der waz veitz . vnd vil gar
0,34751 Bereitete nach dem wunshe wol
0,34752 Er sprach "manige kummers dol
0,34753 Volatin han wir erliten
0,34754 Ich han dicke dar geriten
0,34755 Da ich wande daz min leben
0,34756 Wuerde dem tode gegeben"
0,34757 Da der fuerste dr uf gesaz
0,34758 Vnder im getet er nie baz
0,34759 Er hete gar die tugende
0,34760 Der er pflag in der ivgende
0,34761 Vil wol daz sime hertzen tet
0,34762 Ich waene venie vnd gebet
0,34763 Hete gelazen sin gedang
0,34764 Da volatin so wite sprang
0,34765 Loys gein im geriten kam
0,34766 Als eime kuenge wol gezam
0,34767 Da er in allerverste sach
0,34768 Hin zu den Rittersen er do sprach
0,34769 "Ich wil durch den vil werden
0,34770 Erbeizen vf die erden
0,34771 Vnd gende in enpfahen"
0,34772 Die Ritter alle des iahen
0,34773 Swaz er im eren taete
0,34774 Daz er reht dar zuo haete
0,34775 Zuhant er ab dem oershe saz
0,34776 Willehelm des selben nit vergaz
0,34777 Von im wart aucherbeizet
0,34778 "Der werde gruoz mich heizet"
0,34779 Sprach er "daz ich tot gelige
0,34780 Oder den heiden an gesige"
0,34781 Sie begunden vaste gahen
0,34782 Vil sueze wart daz enpfahen
0,34783 Daz dem Markyse da geschach
0,34784 Loys harte sueze sprach
0,34785 "Gote willekomen vnd mir
0,34786 Got der mueze lonen dir
0,34787 Daz du mir bist zu staten komen
0,34788 Herre iv ist vil vnbenomen
0,34789 Swaz ich iv gedienen mag
0,34790 Ez ist gar miner saelden tag
0,34791 Daz ich dich gesehen han

0,34792 Da von min leit muoz zergan”
0,34793 DEr Markys vil suoze sprach
0,34794 “Swaz iv leides ie geshach
0,34795 Oder leides noch wirret
0,34796 Ir sit des vnuerirret
0,34797 Daz en welle ich helfen rechnen
0,34798 Herre ich wil durch ivch brechen
0,34799 Die gehorsam die ich gote enthiez
0,34800 Da ich die welt gar varen liez
0,34801 Durch kyburge daz reine wip
0,34802 Da der erstorben was der lip
0,34803 Herre daz tet mir also we
0,34804 Daz ich die welt nymmer me
0,34805 Vor iamer gesehen wolte
0,34806 Da mich iwer bote holte
0,34807 Da ich in dem walde was
0,34808 Zehant als ich den brief gelas
0,34809 Da fuor ich mit dem boten dan
0,34810 Der iv vil wol gesagen kan
0,34811 Wie geschaffen was min leben
0,34812 Des han ich mich durch ivch begeben”
0,34813 “Nu lone dir got” sprach kuenc Loys
0,34814 “Wol dan Wir Sueln Gein Paris
0,34815 Du solt gemaches pflegen
0,34816 Vngemaches dich bewegen”
0,34817 Da wart langer niht gebiten
0,34818 Nu het der kuenc niht v’miten
0,34819 Sin lip der kunde shaffen
0,34820 Daz leyen vnd pfaffen
0,34821 Vz gein dem fuersten giengen
0,34822 Vnd in shone enpfiegen
0,34823 Der byshof selbe gein im gieng
0,34824 Vnd mit dem heiligtuome in enpfieg
0,34825 Do daz ersahen die heiden
0,34826 Sie begunden dannen sheiden
0,34827 Vnd sagten disiv maere
0,34828 Dem kuenge daz komen waere
0,34829 Der werde Markys willehalm
0,34830 Da er vernam des maeres galm
0,34831 Da von er also leidig wart
0,34832 Daz in gerav gar div vart
0,34833 Die er hete dar getan
0,34834 Er sprach “wie sol ez vns ergan
0,34835 Ich weiz wol er erwindet niht
0,34836 E . vns der tot von im geshiht”
0,34837 Daz hertze im so sere ershrag
0,34838 Daz er solher vorhte pflag
0,34839 Daz er wande niht genesen

0,34840 “Swaz wir langer hie gewesen
0,34841 Daz nimt vns lib vnd guot
0,34842 Ob ir daz waegste tuot”
0,34843 Sprachen die in da sahen
0,34844 “Wir sueln des vaste gahen
0,34845 Daz wir komen vf daz mer
0,34846 Er erslehet gar daz her
0,34847 Nymmer er des erwindet
0,34848 Swie vns sin lip hie vindet
0,34849 Im ist div nase gewahsen lang
0,34850 Ez ist niht anders sin gedang
0,34851 Wan wie er vns den tot getuo
0,34852 Bliben wir biz morgen vruo
0,34853 So sin wir alle verlorn
0,34854 Wir han die gebaerde an im erkorn
0,34855 Daz vns fuer war kan sheiden
0,34856 Bliben wir von den heiden
0,34857 Von dem libe vnd von dem guote
0,34858 Swes iv nu si zu muote
0,34859 Daz lat in kurtzer zit geshehen
0,34860 Hetet ir in als wir gesehen
0,34861 Ir blibet kurtze stunde
0,34862 Er sprach vz sinem munde
0,34863 Swelhen heiden er ersaeh
0,34864 Daz zu sterben dem geshaeh”
0,34865 DEr kuenc sprach “nu ratet zuo
0,34866 Waz ich laze oder tuo
0,34867 Daz beste ich selbe niht en weiz”
0,34868 “Herre kuenc Matribuleiz”
0,34869 Sprachen sie alle geliche
0,34870 “Der arme vnd der riche
0,34871 Da sueln wir z hie rumen
0,34872 Vnd vns niht langer sumen
0,34873 Daz ist daz beste getan
0,34874 Der mich der vart hete erlan
0,34875 Ich en waer niht komen veber mer
0,34876 A we daz ein so michel her
0,34877 Einen man so gar vliehen sol
0,34878 Daz stet den goten niht zu wol
0,34879 Waz Ob miner Swester Man
0,34880 Ein got selbe wesen kan
0,34881 Daz man in so entsitzet
0,34882 Min lib ist des entwitzet
0,34883 Daz ich in eime zwiuel bin
0,34884 Var ich vor vorhte nahtes hin
0,34885 Des han ich ymmer shande
0,34886 Blibe ich in dem lande
0,34887 So vuerhte ich daz der cristen got

0,34888 Mir fuege laster vnd spot .
0,34889 Als er vil dicke hat getan
0,34890 Wol vf ich wil den zwiuel lan
0,34891 Vnd balde tuon den hinker
0,34892 Als tet min vater Terramer
0,34893 Der auch dem Markyse entran
0,34894 So michel her er nie gewan
0,34895 Er n mueste doch entrinnen
0,34896 Vnd lasters vil gewinnen
0,34897 Vnd shaden harte groz”
0,34898 Daz velt zu alytshantz lag bloz
0,34899 Von den verfluohten heiden
0,34900 Die dannen kunden sheiden
0,34901 Mit vil harte grozer maht
0,34902 Da in komen was div naht
0,34903 Waz daz niht ein wunder gar
0,34904 Daz sie waren komen dar
0,34905 Zu shaden gar den cristen
0,34906 Got kan vil wol gevrissen
0,34907 Die er die sine hat genant
0,34908 Sus wart der franzen lant
0,34909 Erlost von der kuenfte gar
0,34910 Die der Markys tet dar
0,34911 Noch wil ich iv sagen mere
0,34912 Da die heiden den hinkere
0,34913 Betalle gar getaten
0,34914 Von der vorhte die sie haten
0,34915 Gein Willehelme dem Markyse
0,34916 Nu kam in suezer wise
0,34917 Ein stimme dar der reine slief
0,34918 Vil sanfte sie an in rief
0,34919 Vnd sprach “ez sint die heiden
0,34920 Da von gar hin gescheiden
0,34921 Daz du in dem lande bist
0,34922 Ich was bi dir in kurtzer vrist
0,34923 In dem walde da du waere
0,34924 und tet dir kunt ditz mere
0,34925 Als dir hie ist geshehen
0,34926 Tuo als ich dir wil veriehen
0,34927 Daz kan dir saelde meren
0,34928 Du solt von hinnen keren
0,34929 Vnd daz tuon vil shiere
0,34930 Nahe bi Mumbasiliere
0,34931 Ein vorste vnder eim gebirge lit
0,34932 Da solt du dine lebenes zit
0,34933 Daz wizze beliben gar .
0,34934 Got der nimt din da war
0,34935 Daz ez dich muoz gnuegen

0,34936 Sich beginnet din ding fuegen
0,34937 Daz du gote den dienst tuost
0,34938 Des du gein im geniezen muost
0,34939 Ein closter du da machen solt
0,34940 Dar vmme git er dir den solt
0,34941 Daz din sele ist genesen
0,34942 Swaz ich dir vor han gelesen
0,34943 Daz solt du tuon in kurtzem zil
0,34944 Da mit ich von dir sheiden wil”
0,34945 DIv Stimme Gesweig Iesa
0,34946 D’ Markys lag nit langer da
0,34947 Er gieng hin da loys lag
0,34948 Vnd sich gein dem strite wag
0,34949 Er vnd manic werder man
0,34950 Er sprach “Markys nu sage an
0,34951 Des ich dich hie vrage
0,34952 Wie gebares du so trage
0,34953 Ich waen du wilt nit striten”
0,34954 “Nein ich zu disen ziten”
0,34955 Sprach der Markys willehalm
0,34956 “Mir hat geseit ein suezer galm
0,34957 Daz die vnreinen heiden
0,34958 Alle sint hinnen gescheiden
0,34959 Vns hat der here gotes trost
0,34960 Von der grozen arbeit erlost
0,34961 Des sueln wir im gnade sagen
0,34962 Daz muosten so gar verzagen
0,34963 Die heiden von sime gebote
0,34964 Wizze wer getruwet gote
0,34965 Daz er in nymmer verlat
0,34966 Daz er vns so beraten hat
0,34967 Markys daz ist von dir geshehen
0,34968 Herre nu heizet beschen
0,34969 Ob ich habe gesaget war
0,34970 Ich wil mine lebenden iar
0,34971 Nymmer getuon kein luege
0,34972 Ob ich herre ivch betruege
0,34973 Daz waer an mir ein vntat
0,34974 Swaz iv min munt gesaget hat
0,34975 Bi namen daz ist div warheit”
0,34976 Da mit der kuenc selbe reit
0,34977 Da die heiden warn gelegen
0,34978 Sin hertze kunde vraeuden pflegen
0,34979 Daz die verfluohten heiden
0,34980 Ane strit hin warn gescheiden
0,34981 Da sie vf dem velde riten
0,34982 Vo- willehalme wart nit v’miten
0,34983 Er n lieze volatinen

0,34984 In soelhen spruengen shinen
0,34985 Als er waer ein swertdegen
0,34986 Von Ritters munde manig seggen
0,34987 Wart dem Markyse gegeben
0,34988 Er het gelebet so sin leben
0,34989 Daz er in allen landen
0,34990 Was vri vor allen shanden
0,34991 Nu sprach hin tz im der kuenc Loys
0,34992 “Vil hertzelieber Markys
0,34993 Nu la dich niht betragen
0,34994 Des ich dich welle vragen
0,34995 Min bote tet mir bekant
0,34996 Den ich hete nach dir gesant
0,34997 War vmme du daz taete
0,34998 Swelch vncrut du nider traete
0,34999 Din hant daz wider rihte
0,35000 Vnd ahtes daz zu nihte
0,35001 Daz crut von guoter arte
0,35002 Des wundert mich vil harte”
0,35003 “War zuo min lip daz habe getan
0,35004 Daz wil ich ivch wizzen lan”
0,35005 Sprach der werde Markys
0,35006 “Herre ich tet ez in der wis
0,35007 Wer lieb vnedels liute hat
0,35008 Vnd die edeln varn lat
0,35009 Da hin han ih z gemezzen
0,35010 Ir En waert Niht Besezzen
0,35011 Hetet ir die edeln behalten
0,35012 Die vnedeln da hin gehalten
0,35013 So kuende ez niht geshehen sin”
0,35014 “Markys nu nim die triwe min
0,35015 Daz mir leit ist daz ih z tet
0,35016 Ich wil dir loben an diser stet
0,35017 Daz ich ez laze ymmer mer”
0,35018 Da mit taten sie den ker
0,35019 Hin gein Paris der stat
0,35020 Loys willehelmen bat
0,35021 Vlizecliche vnd vil starke
0,35022 Daz er wider naeme die Marke
0,35023 Vnd swaz er wolte der lande
0,35024 Er sprach “daz waer ein shande
0,35025 Iv vnd gar mime kuenne
0,35026 Wuerde ich ein abtruenne
0,35027 Swaz mir got hat geboten
0,35028 Vnd enboten mit sinen boten
0,35029 Im gehorsam ich des bin
0,35030 Wan min sin sich rihtet hin
0,35031 Daz wil min hertze iv enbaren

0,35032 Ich wil in eine wueste varen
0,35033 Bi Muntbasilier nahen
0,35034 Da zu eime closter varen
0,35035 Zu ere der reinen maget
0,35036 Div an helfe ist vnuerzaget
0,35037 Swer ez reine an sie suochet
0,35038 Ob ez crist ir sun geruochet
0,35039 So buwe ich da in ir namen
0,35040 Des sich nit sol min sele shamen”
0,35041 “Nv sage mir lieber kyllames
0,35042 Wilt du nit erwinden des
0,35043 Markys du en woelles dar
0,35044 So wil ich dir geben gar
0,35045 Swes din lip bedarf dar zu”
0,35046 “Nein ich wil spate vnd vruo
0,35047 Arbeiten vaste den lip”
0,35048 “Markys mir vraeude nit vertrip
0,35049 Des wil ich biten dich durch got
0,35050 Ez waere gar der lute spot
0,35051 Ob du min guot verspraeches
0,35052 Die triwe du gar braeches
0,35053 Die du mir dicke erzeiget hast
0,35054 Wizze daz du an mir begast
0,35055 Daz ymmer truret mir der muot
0,35056 Ob dir versmahen kan min guot”
0,35057 “HERre mir v’smahet niht
0,35058 Swaz dienstes gote von mir ge geshiht
0,35059 Daz ir im sendet kum ich dar
0,35060 Des nim ich also guote war
0,35061 Daz ez iv an der sele frumt
0,35062 So sie von dem libe kumt”
0,35063 Des antwurte im kuenc Loys
0,35064 “Willehelm lieber Markys
0,35065 Tuo ein ding des ich dich bite
0,35066 Da meres du dine saelde mite
0,35067 Ruoche sehen die swester din
0,35068 Div hat hertzelichen pin
0,35069 Nach dir suezer man erliten
0,35070 Daz sie ein sterben hat vermiten
0,35071 Fuer war da lit ein wunder an
0,35072 Nu gewer mich Markys lieber man
0,35073 So kan vns lieber niht geshehen”
0,35074 “Herre ich wil sie gesehen
0,35075 Ob Ez Hie Bi So Nahen Ist
0,35076 Wan ich wil in kurtzer vrist
0,35077 Komen . da mir ist gegeben
0,35078 Ein heimuot al min leben”
0,35079 Nu kamen sie hin in paris

0,35080 Da begunde man der Markys
0,35081 Vil vlizeclichen shawen
0,35082 Werde Ritter vnd vrawen
0,35083 Der arme dar zuo der riche
0,35084 Die wunshten alle geliche
0,35085 Daz got in gar gewerte
0,35086 Swez er mit vlize gerte
0,35087 Des werden man vil shone pflag
0,35088 Da sich erluhte der ander tag
0,35089 Gein kurtonie sie riten
0,35090 Vngerne hete do vermiten
0,35091 Die was aller shanden bar
0,35092 Sie en kaeme gein ir bruoder dar
0,35093 Vf eim vil shoenen plane
0,35094 Div reine valshes ane
0,35095 Enpfieng ir bruoder vil suoze
0,35096 Mit so getriwem gruoze
0,35097 Man mich vil selten gruezet
0,35098 Der kuengin wart gebuezet
0,35099 Ir lange werndiv swaere
0,35100 Vnd wart gar vraeudenbaere
0,35101 Ir bruoder kuste sie dicke
0,35102 Mit gesueztem anblicke
0,35103 Sach sie in guetlichen an
0,35104 Vnd sprach “a we saelig man
0,35105 Wa bist du so lange gewesen
0,35106 Von diner kunft bin ich genesen
0,35107 Dar zuo wer buwet daz lant
0,35108 Got hat dich bruoder mir gesant
0,35109 Du solt aber diner Marke pflegen”
0,35110 “Vrawe ich han mich bewegen
0,35111 Daz ich guot gewinne nymmer me”
0,35112 “A we bruoder mir a we
0,35113 Was hast du gesprochen nu
0,35114 Wir dahten willehelm daz du
0,35115 Bi vns bliben woeltes hie”
0,35116 Da kyburg in die cluse gie
0,35117 Sa zu dem selben male
0,35118 Verkos ich Prouenzale
0,35119 Vnd guotes vil vnd ere
0,35120 Vnd wil nymmer mere
0,35121 Kein eigen guot gewinnen
0,35122 Swanne ich nu sheide hinnen
0,35123 So wil ich varn an eine stat
0,35124 Da menshen fuoz selten trat
0,35125 Da wil ich mich ziehen hin
0,35126 Swaz ich langer hie gebin
0,35127 Vil vnsanfte mir daz tuot

0,35128 Ich weiz wol got der ist so guot
0,35129 Daz er mich nit verderben lat
0,35130 Als er mir dicke erzeiget hat
0,35131 Siner gnade ich wol getruwe
0,35132 Da ich siner muoter buwe
0,35133 Daz er mir helfe dar zuo
0,35134 Vrawe ich wil morgen vruo
0,35135 Daz wizzet hinnen sheiden
0,35136 Got helfe des vns beiden
0,35137 Daz wir sin hulde erwerben
0,35138 E· daz wir muezen sterben
0,35139 Zwuo naht sie mit einand' warn
0,35140 Sie Beide Niht Verbar
0,35141 Gein einander rede sueze
0,35142 "Got mir des helfen mueze
0,35143 Bruoder daz ich dich suelle gesehen
0,35144 Daz enbliben sol geshehen"
0,35145 "Vrawe" sprach der Markys
0,35146 "Ich wolte daz der kuenc Loys
0,35147 Vnd ir vil liebiv vrawe guot
0,35148 Hetet gesetzet iwern muot
0,35149 Daz iv zu m besten kaeme
0,35150 So ivch der tot hie naeme"
0,35151 Sie beide retten rede vil
0,35152 Nu was ez komen an daz zil
0,35153 Daz willehelm der werde man
0,35154 Wolte sheiden von dan
0,35155 Ein michel iamer da wart
0,35156 Da vnuendig was sin vart
0,35157 Da sprach div kuenginne
0,35158 "Nymmer ich me gewinne
0,35159 Vor leide keinen guoten tag
0,35160 A we daz ich niht sterben mag
0,35161 Daz mir den tot nit got beshert
0,35162 Sit min bruoder von mir vert
0,35163 Nymmer ich daz veberwinde"
0,35164 "Vrawe der clage erwinde
0,35165 Ez n hilfet niht din clagender muot
0,35166 Wir sueln im geben dar daz guot
0,35167 Daz er buwet deste baz
0,35168 Waz ob vns got ershaffet daz
0,35169 Daz wir die sele da ernern"
0,35170 "Den muot mueze vns got beshern"
0,35171 Div kuengin vil sueze sprach
0,35172 Der Markys den iamer brach
0,35173 Von siner swester er sich shiet
0,35174 An welhe stat sin vart geriet
0,35175 Daz habt ir wol vernomen . e .

0,35176 Mit im fuor dannen nieman me
0,35177 Wan sin geverte volatin
0,35178 Der manigen kummerlichen pin
0,35179 In sime dienste hat erliten
0,35180 Got begunde er vaste biten
0,35181 Daz er in rehte wiste dar
0,35182 Swes er n bat des gewert in gar
0,35183 Div vil reine Trinitat
0,35184 Div groze barmunge hat
0,35185 Nv was der Markys shiere
0,35186 Komen zu Muntbasiliere
0,35187 Da begunde er durch stapfen
0,35188 Nu wa't an in ein kapfen
0,35189 Daz er also eine reit
0,35190 Vnd an fuorte so richiv cleit
0,35191 Michel wunder sie des nam
0,35192 Einen ivngen gaeteling gezam
0,35193 Daz er in vragte der maere
0,35194 Wannan sin riten waere
0,35195 "Was wilt du des liebes kint"
0,35196 "Daz ir so wol geiaret bint
0,35197 Vnd iwer oersh in spruengen gat
0,35198 Dem grawen hare daz niht stat"
0,35199 "Dirre rede sit ir ze ivng
0,35200 Waz irret ivch mins oershes sprung
0,35201 Oder was shadet iv min gewant
0,35202 Ich rite durch ein wites lant
0,35203 Ob ich iv daz verzollen sol
0,35204 Daz stet niht dem riche wol
0,35205 Ivncherre Lat Mich Riten
0,35206 Sol ich hie langer biten
0,35207 Vnser einen daz geriwen mag
0,35208 Vnd woelte ich ymmer mere slag
0,35209 Geslahen vffe keinen man
0,35210 Ir muestet von mir gen hin dan"
0,35211 Nv kamen zuo gedrunge
0,35212 Die alten mit den ivngen
0,35213 "Waz sint disiv maere"
0,35214 sprach der stete rihtaere
0,35215 Der Markys willehelm der sprach
0,35216 Ich waene diz ie man gesach
0,35217 Daz mir geshiht in dirre stat
0,35218 Ich rite vf acker noch vf sat
0,35219 Ich rite des riches strazen
0,35220 Heitz mich riten lazen
0,35221 Sit ir z der potestate
0,35222 So rihtet mir vil drate
0,35223 Daz mich der benoetet hat

0,35224 Herre der dort bi iv stat
0,35225 Oder ich tuon etteswaz
0,35226 Daz vermiten waere baz
0,35227 Der riht'e shone sprach
0,35228 "Mir ist leit vnd vngemach
0,35229 Herre was iv geschehen ist
0,35230 Daz ersehet ir in kurzer vrist"
0,35231 Er sprach wol vz der straze
0,35232 "Daz ivch got verwaze
0,35233 Hie heltet der tivreste man
0,35234 Den div welt ie gewan
0,35235 Daz weiz ich war z svnder wan
0,35236 Wan ih z dicke gesehen han
0,35237 Von im . niht ze einem male
0,35238 Der Markys von Prouenzale
0,35239 Weiz ich wol daz ir daz sit
0,35240 Ich sach ivch striten einen strit
0,35241 Da manig Ritter tot gelag
0,35242 Iwer pris da fuer sie alle wag
0,35243 Die zu beider sit da waren
0,35244 Hey waert ir in den iaren
0,35245 Als do der strit geshach
0,35246 So waer erwant daz vngemach
0,35247 Daz vns ein Rise dicke tuot
0,35248 Er giht er welle han daz guot
0,35249 Daz da hat der werde kuenc Loys
0,35250 Er ist gekeret gein Paris
0,35251 Vnd waent vinden die heyden
0,35252 Die dannen muosten sheiden
0,35253 Herre da ir kamet dar
0,35254 Da entrunnen sie vil gar
0,35255 Von der grozen vorhte
0,35256 Daz iwer lip sie entworhte
0,35257 Nv rite ich von paris da her
0,35258 Die rehten straze vnd daz er
0,35259 Mir vf dem wege niht bekam
0,35260 Des ist min muot an vraeuden lam
0,35261 Weste daz der kuenc Loys
0,35262 Da wir waren in Paris
0,35263 Daz waz an im ein vnfuog
0,35264 Daz er mir z nie zuo gewuog
0,35265 Herre ez was im vnbekant
0,35266 Er kam erste in diz lant
0,35267 Da wir in Paris lagen
0,35268 Vnd grozer sorgen pflagen
0,35269 Biz daz iwer kuenfte trost
0,35270 [...] [...]"]